

Insait:

Tomuriesa
laikim akwital
ripot - P2



Arore: Polis
askim mani
long mi - P2

Potape: Mi
gavana bi-
long Hela - P3



Steamship
sapotim yet
YWAM Medikal
Sip- P9



Sir Mekere i tok O'Neill no tok tru long Ok Tedi

SIAMAN bilong PNG Sustainable Development Program Limited (PNGSDP), Sir Mekere Morauta, i tok sampela toktok Praim Minista Peter O'Neill i mekim long PNGSDP na em yet long Palamen long las wik Trinde i no stret.

Sir Mekere I putim niuspepa ed-

vataismen long bekim ol toktok bilong Praim Minista O'Neill.

Sir Mekere i tok dispela olgeta toktok em i no tru, na em i laikim Praim Minista O'Neill i mas tok sori long giamanim Palamen na pablik.

"Kain pasin i soim krangki wok

long Opis bilong Praim Minista we O'Neill oltaim i save tanim tok, i no tokaut long olgeta samting i tru na i mekim ol krangki tok long giamanim pablik long soim olsem wok na tok em i mekim i tru," Sir Mekere i tok.

Sir Mekere i tok Mista O'Neill i

no giamanim wanpela man wantam ol switpela tok bilong en.

"Pablik i save Praim Minista i wok long traime na haitim ol asua long rausim ol sea bilong PNGSDP long Ok Tedi Maining Ltd," Mista O'Neill i tok.

I go moa long pes 4...



Tripela pastaim Praim Minista bilong Papua Niugini, L-R Gavana bilong Nu Ireland, Sir Julius Chan, Gavana bilong Is Sepik provins, Gren Sif Sir Michael Somare, na Sir Mekere Morauta, Siaman bilong PNGSDP, i bin stap long wanpela konvensen bung long Pot Mosbi, i no longtaim i go pinis. *Poto: Wantok fail poto.*



Dove Travel

The oldest and most experienced travel agency in PNG

Try us for all your travel needs...local or international, we will not be beaten on price.

Call us on **325 9800** or call in to our office Cnr Angau Drive and Lahara Avenue, Boroko.

- Corporate travel is our specialty.
- Credit is offered to those companies who qualify.
- No hidden charges on airline bookings.
- Agents for Air Niugini, PNG Airlines and Qantas.

Ph: 325 9800 Fax: 325 1451 Email: sales@dovetravel.com.pg



Tomuriesa laikim akwital ripot

OL memba bilong wan wan distrik we loging i kamap bai kisim loging ekpot di-velopmen levi (LEDL), Minista bilong Fores, Douglas Tomuriesa i tok.

Minista Tomuriesa i tok Nesanel Fores Atoriti (NFA) i save givim LEDL mani long distrik we loging i save kamap, na LEDL mani bilong dispela yia em i stap.

"Tasol long kisim LEDL mani bilong dispela yia, mi laik askim ol wan wan distrik husat i bin kisim pinis long las yia na bipo las yia, long kisim akwital ripot i kam long opis

bilong mi," Mista Tomuriesa i tok.

"Mi nidim akwital ripot. Sapos yupela i laik kisim LEDL bilong dispela yia, yupela ol Memba na Sif Eksektiv Opisa (CEO) bilong wan wan Distrik Developmen Atoriti (DDA) i mas kisim ripot bilong yupela bilong mani yupela i bin yusim long las yia," Mista Tomuriesa i tok.

Mista Tomuriesa i autim dispela toktok long bekim toktok bilong Memba bilong Angoram, Sailo Waipo, husat i bin askim sapos LEDL em i mani bilong ol papagraun o no gat.

Mista Waipo i bin askim sapos ol papagraun bilong Angoram distrik, we loging i kamap, i ken kisim LEDL mani bilong yia 2016.

Tasol Mista Tomuriesa i tok LEDL em i no mani bilong ol papagraun, tasol em i mani bilong developmen we ol DDA i save kisim.

"Mani bilong ol papagraun long loging eria em i royalti mani. Royalti mani em i bilong ol manmeri na papagraun husat i stap long ples we loging i kamap. Tasol LEDL em i mani bilong distrik.

"Open Memba bi-

long distrik we loging i kamap i mas kisim na em yusim long givim ol developmen projek insait long distrik we loging i kamap," Mista Tomuriesa i tok.

Mista Tomuriesa i salensim ol memba na CEO bilong DDA long yusim gut dispela mani na givim sevis long ol pipel.

"Mi laikim ol CEO bilong DDA long givim bek ol akwital ripot long wanem rot ol i yusim LEDL bilong ol," Tomuriesa i tok.

Mista Tomuriesa i givim dispela toksave long ol distrik we loging i save kamap

Prais bilong balus tiket em i antap

PRAIS bilong baim balus tiket long ran long Air Niugini namel long Pot Mosbi na Goroka em i dia tumas, Memba bilong Goroka, Bire Kimisopa i tok.

Mista Kimisopa i tokim Palamen las wik olsem prais bilong baim POM-Goroka Air Niugini tiket em i K660 na POM-Hagen balus tiket em i K653.

Mista Kimisopa i askim Minista bilong Pablik Entaprais, William Duma, long tokaut long as tru bilong prais bilong baim balus tiket long Goroka em i bikpela mani.

"Wanem kain samting stret i kamapim prais bi-

long baim balus tiket i go antap. Mi save olsem Goroka em i klostu long Pot Mosbi na Mt Hagen em i longwe long Pot Mosbi.

"Tasol prais bilong baim balus tiket long Goroka em i bikpela mani. Mi laik save long as tru bilong dispela samting," Mista Kimisopa i tok.

Mista Duma i tok prais bilong baim balus tiket em i antap tru long PNG bikos ol balus kampani i save baim fiul bilong balus long bikpela mani.

I gat ol arapel a sekyuriti samting tu we ol balus kampani i save lukluk long sasim prais bi-

long balus tiket.

"Sampela ol samting olsem prais bilong fiul, mani bilong ol wokman, sekyuriti, na arapela samting i save mekm prais bilong balus tiket long go antap o go daun," Mista Duma i tok.

Em i tok em bai sekim wantaim menesmen bilong Air Niugini na askim sapos ol i ken lukluk long dispela samting.

"Mi bai toktok wantaim menesmen bilong Air Niugini na sekim sapos mipela i ken daunim prais bilong baim balus tiket long Goroka na long sampela taun na senta tu," Mista Duma i tok.

Arore: Polisman askim mani long mi

SAMPELA polisman i wok long askim mani long Memba bilong Ijivitari, David Arore.

Mista Arore i autim dispela toktok long Palamen long las wik.

Em i tok ol dispela polisman i bin go long Oro Provins long mekim sampela wok painimaut long Popondetta.

Mista Arore i tok Oro Provinsal Gavman i bin kisim ol dispela polisman bilong Pot Mosbi i go long Popondetta long mekim sampela wok painimaut i go insait long sekim mani bilong Provinsal gavman.

Long Me 6, 2016 sampela ol polisman bilong Nesanel Frod Skwat i bin askim Mista Arore long peim ol K1.6 milien.

Mista Arore i tok em i paul pinis taim ol i kolim em long mobail pon na tokim em long peim dispela kain mani i go in-

sait long wanpela kampani.

"Ol dispela polisman i wok long distebim na pretim ol wok manmeri bilong mi long Popondetta. Ol i wok long mekim kain kain pasin, olsem tru ol i stap antap long lo," Mista Arore i tok.

Em i tok dispela ol polisman i bilong Nesanel Frod Skwat i wok long pretim em na askim em long baim ol sampela mani.

"Ol i askim mi long baim K1.6 milien. Sapos mi no peim dispela mani, ol i tok ol bai kamautim olgeta samting mi mekim.

"Mi no mekim wanpela rong samting na mi paul pinis. Mi laik askim Minista bilong Polis sapos em i save long dispela o nogat?" Mista Arore i askim.

Polis Minista Robert Atiyafa i tok ol dispela polisman i bin go long Popondetta long mekim ol

wok painimaut bikos Oro Provinsal gavman i bin tokim ol long go.

"Yes, mi save olsem dispela ol polisman i bin go long Oro taim provinsal gavman i bin askim ol long mekim sampela wok painimaut," Mista Atiafa i tok.

Em i tok ol i bin go long mekim wok tasol ol i no bihainim lo long mekim wok na dispela i no gutpela pasin.

"I gat wanpela komplein i bin kam long Oro Provinsal Gavman olsem sampela mani bilong provinsal gavman i lus.

"Long dispela as, ol polisman ya i bin go long sekim olsem wanem dispela mani i lus natin. Tasol mi no wanbel long dispela kain pasin bilong ol long pretim ol manmeri na askim mani long memba," Mista Atiafa i tok.

GAVANA bilong Nesanel Kapital Distrik (NCD), Powes Parkop, i laikim Palamen long mekim wanpela lo bilong dai.

Mista Parkop i tok PNG i no gat wanpela lo bilong reguletim dai bilong ol mameri na dispela i kamapim dai olsem wanpela bikpela hevi insait long kantri.

Mista Parkop i tok insait long wan wik tasol em i go long 7-pela haus kra i insait long siti.

Em i tok planti haus kra i kamap long Pot Mosbi siti na pasin bilong yumi ol manmeri long PNG long haus kra i taim em i narapela kain.

"Pasin bilong sori i stap wantaim yumi. Na yumi save givim mani na kaikai long ol haus kra i lain.



GAVANA bilong Nesanel Kapital Distrik (NCD), Powes Parkop

Tasol yumi wok long mekim yet dispela kain pasin na mani i wok long pinis.

"Wanpela haus kra i kamap, yumi kisim mani i go. Narapela i dai gen, yumi betim mani gen na kisim i go," Mista Parkop i tok.

Mista Parkop i tok pasin bilong haus kra i wok long westim bikpela mani na dispela i no gut-

pela pasin.

Em i askim Minista bilong Komyuniti Developmen, Delilah Gore, sapos gavman i gat sampela lo na polisi long dai.

Minista Gore i tok gavman i no gat wanpela lo o polisi long dai, tasol em bai toktok wantaim ol wokman bilong em na kamapim wanpela lo.

"Dispela em i gutpela askim. Planti manmeri i wok long dai na prais bilong stap long haus kra i kamap bikpela mani tru.

"Insuren i stap tasol em bilong ol wok manmeri tasol. Bai mi toktok wantaim ol wok manmeri long opis bilong mi na askim sapos yumi i ken putim wanpela polisi long stretim dispela hevi bilong dai," em i tok.

Rurel distrik na provins mas kisim moa mani

GAVANA bilong Morobe, Kelly Naru, i tok sampela ol lida i save sevim ol manmeri husat i stap long bus ples na ol i mas kisim sampela ekstra mani aninit long PSIP na DSIP fan.

Mista Naru i mekim dispela toktok long sapatim singaut bilong

Memba bilong Telefomin Solan Mirisim.

Mista Mirisim i bin singautim gavman long glasim gut arapela ol mani mak olsem long baim balus, hairim kar o hairim sip taim ol memba o gavana i laik karim ol kago long mekim wok developmen.

Mista Naru i tok ol ples i stap klostu long taun na siti i orait long ol i ken baim ol samting klostu long stua na kirapim ol projek insait long distrik o provins bilong ol.

Tasol sampela ol distrik na provins we i no gat gutpela rot na bris i save kisim taim long karim

kago i go long ples long mekim ol developmen wok.

"Bikos i no gat gutpela rot na bris, mipela i save yusim bikpela mani long baim balus o hairim kar long kisim ol kako.

"Sapos mi laik kirapim wanpela klasrum long Kabwum, Siassi Ailan

o antap long Menyamya, mani mak bilong haiaim ol kar, balus o sip em i bikpela tru. Planti mani i save go long transpot na lojistik, na liklik mani tasol mi save yusim long mekim wok," Mista Naru i tok.

Maipakai: Man Saina bagarapim pablik mani

MEMBA bilong Kikori, Mark Maipakai, i tok wanpela man Saina i bin kisim K9 milien long kirapim edministresen opis bilong Kerema distrik tasol kampani bilong em i no pinisim dispela projek.

Mista Maipakai i tok dispela Saina man i bin kisim dispela mani long gavman tasol em i no kirapim dispela haus.

Mista Maipakai i no tokaut long nem bilong dispela man Saina, tasol em i tok em i save ranim wanpela liklik stua long Kerema.

"I no gat wanpela haus i kamap. Mi no save dispela mani i go we?" Mista Maipakai i tok.

Mista Maipakai i autim dispela toktok long Palamen las wik na i askim sapos Fainens Minista James Marape i save long dispela projek o nogat.

Em i tok Galp Provinsal Gavman i bin givim dispela projek long wanpela man Saina, husat i no gat ekspirens long mekim haus o konstraksen wok.

"Dispela man Saina i no gat ekpirens long mekim dispela kain haus. Em i save ranim liklik tred stua long Kerema na mi no save olsem wanem na em i kisim dispela bikpela mani bilong pipel," Mista Maipakai i tok.

Fainens Minista James Marape i tok em i no save long wanpela samting i kamap long Galp tasol em i tok em bai askim ol opisa bilong em long sekim sapos dispela K9 milien i mekim wok o no gat.

Mista Maipakai i tok planti taim ol man i save stilim mani bilong ol pipel na ol i no save givim sevis long ol pipel.

"Mi laik askim Polis Frod



MEMBA bilong Kikori, Mark Maipakai

Skwat long sekim sapos dispela mani i mekim wok o ol man i stilim na kaikai.

"Em i pablik mani na polis na gavman ejensi i mas wok bung long mekim wok painimaut i go insait long dispela stil pasin i kamap long Galp Provins," Mista Maipakai i tok.

Mista Maipakai i tok planti pasin korapsen i kamap long Galp Provins na em i askim ol Polis Frod Skwat long sekim na mekim wok painimaut long dispela.

Em i tok maski namba tu LNG Projek bilong kantri i kamap long Galp, ol manmeri i no stap gut long provins bikos pasin korapsen i no givim sans long larim ol pipel i kisim sevis na developmen long provins.

Tasol Mista Marape i tok em i no save long dispela haus we Galp Provinsal Edministresen i bin givim kontrak long man Saina i mekim.

"Mi no save long dispela samting. Tasol bai mi sekim ol wantaim ol opisa bilong mi, na toksave long yu long bihain taim," Mista Marape i tok.

Chan na Philemon kamapim tupela sista provins

NU Ailan Provins na Milen Be Provins bai kamap tupela sista provins na pasin poroman namel long tupela provins bai kamap strongpela tru.

Gavana bilong Nu Ailan, Sir Julius Chan na Gavana bilong Milen Be, Titus Philemon, i tokaut long kamapim dispela nupela poroman namel long Nu Ailan na Milen Be.

Tupela gavana i autim dispela plen long Nu Ailan de long Konos long Julai 27.

Sir Julius i tok; "Mipela i amamas long luksave long Titus Philemon, husat i Gavana blong Milen Be. Em i kam stap wantaim yumi long hia, na dispela i soim olsem wok poroman namel long tupela provins bilong yumi, Nu Ailan na Milen Be, i kamap



Gavana Chan na Gavana Philemon

strongpela tumas," Sir Julius i tok.

Gavana Philemon i bin go lukim Nu Ailan de olsem wanpela gest bilong Sir Julius.

Mista Philemon i tokim ol manmeri Nu Ailan olsem em i lukim planti gutpela developmen i kamap long Nu Ailan taim Sir Julius i kamap gavana long yia 2007.



"Nu Ailan i soim gutpela rot long bringim developmen long ples na sevis long manmeri. Mipela long Milen Be i lukluk gut long wanem samting Sir Julius i mekim long senisim laip bilong ol manmeri bilong yumi long Nu Ailan.

Mista Philemon i tok long Milen Be, provinsal gavman bilong em bringim planti gut-

pela developmen, wankain olsem Sir Julius i mekim long Nu Ailan.

"Long Milen Be ol manmeri i kisim sevis gud. Mi bilip long Nu Ailan tu, ol manmeri i lukim planti gutpela developmen aninit long lidasip bilong Sir Julius.

"Dispela plen we mitupela tokaut long kamapim Nu Ailan na Milen Be i kamap sista provins em i wanpela gutpela plen," Gavana Philemon i tok.

Gavana Chan na Gavana Philemon i tok klostu taim tupela bai kamapim wanpela memorandum ov agrimen na kamapim ol samting long kirapim nupela poroman namel long Nu Ailan na Milen Be.

Potape: Mi gavana bilong Hela

MEMBA bilong Komo-Margarima, Francis Potape, i tok Memba bilong Koroba-Lake Kopiago, Philip Undialu, i no bihainim stretpela rot aninit long lo long makim em yet i kamap ekting gavana bilong Hela Provins.

Mista Potape i strongim kona olsem aninit long Stending Oda namba 12 bilong Provinsal Asembli, Asembli Klak i no gat pawa long kamap siaman bilong Haus ov Asembli.

Mista Potape i mekim dispela toktok bikos Asembli Klak bilong Hela Provinsal Asembli i bin kamap siaman long moning bilong Julai 5 we i bin lukim ol asembli memba i makim Mista Undialu i kamap ekting gavana.

Long apinun bilong Julai 5, Deputi Gavana Thomas Potape, i bin kamap siaman bilong asembli miting we i



Komo-Margarima MP Francis Potape (raithan) wantaim Deputi Gavana bilong Hela, Thomas Potape.

bin lukim ol asembli membna i makim Francis Potape i kamap ekting gavana.

"Mi nupela ekting Gavana bilong Hela bikos mi bihainim lo stret. Deputi Gavana i bin kamap siaman bilong dispela bung we ol memba i bin makim mi kamap ekting gavana," Mista Potape i tok.

Mista Potape i go long Ne-

senel Kot long stretim dispela asua.

"Mi gavana bilong Hela. Mi bai go long kot wantaim ligel edvais bilong Stet Solisita, Daniel Rolpagarea," Mista Potape i tok.

Long wankain taim, Mista Undialu i strongim kona tu olsem em i ekting gavana bilong Hela.

Tasol ligel edvais bilong

Stet Solisita Daniel Rolpagarea i tok Mista Undialu i no bin bihainim stret lo na ol stending oda long kamap ekting gavana.

Mista Rolpagarea i bin givim dispela edvais i go long Seketeri bilong Dipatmen ov Provinsal na Lokal Level Gavman Afeas, Dickson Guina, long Julai 14.

SMART SOLUTIONS FOR SMALL BUSINESS

"With the **BSP Smart Business Package**, I offer the right mix of payment options for my customers; **EFTPoS, Mobile and Internet Banking** and I use a **Smart Business Debit Card** for my supplier payments.

Plus, the Smart Business current account provided transaction records that were used to support my **BSP Smart Business Loan** application to help me expand my Business."

Helen Victor
Owner of Zoenani Gas Ltd
BSP Smart Business customer



WE ARE **BSP**

Provinsal gavman na papamama mas helpim yuni sumatin

OL wan wan provinsal gavman na papamama i mas helpim ol sumatin bilong Yunivesiti of PNG (UPNG) na PNG Yunivesiti of Teknoloji (Unitech) i kam bek gen long statim skul.

Minista bilong Haia Edukesen, Risets, Sains na Teknoloji (HERST), Francis Marus, i tok HERST bai baim tiket bilong balus long helpim ol sumatin husat i stap long skolasip bilong Opis bilong Haia Edukesen (OHE).

“Tasol mi laik askim ol provinsal gavman na ol papamama long helpim arapela ol sumatin husat i no stap long sponsasip bilong OHE,” Mista Marus i tok.

Mista Marus i tok ol provinsal gavman na papamama i mas helpim ol self sponsa

sumatin long kam bek gen long skul bikos dispela em i gutpela helpim na gutpela investimen long edukesen bilong ol pikinini.

“Sefti bilong ol sumatin i stap gut. Ol bai kam bek gen na statim gen skul na polis bai helpim long sekyuriti na sefti.

“Dipatmen bilong mi i toktok pinis wantaim kaunsil bilong UPNG na Unitech. Mipela i toktok pinis wantaim ol polisman na ol bai givim sekyuriti,” Mista Marus i tok.

Em i tok tupela gavana bilong Enga na Sauten Hailans provins i toktok pinis wantaim ol lida bilong sumatin long dispela tupela provins, na ol sumatin i redi long go bek na statim skul long mun Septemba.

Mista Marus i mekim dispela toktok long Palamen long Tunde long dispela wik taim Gavana bilong Milen Be, Titus Philemon, i askim sapos sefti bilong ol sumatin bai stap gut sapos ol i kam bek gen long skul.

Mista Philemon i bin askim Mista Marus husat bai baim balus tiket bilong ol sumatin husat i self sponsa.

Tupela wik i go pinis, Praim Minista Peter O’Neill i bin tok aut oslem gavman bai saposim ol sumatin bilong dispela tupela biknem yunivesiti bilong kantri long kam bek gen na pinisim skul yia bilong 2016.

Tasol Mista O’Neill i bin givim tok lukaut long ol sumatin olsem ol no ken kam bek gen

long westim taim mani bilong ol sponsa na papamama bilong ol.

Em i tok gavman i les long harim o lukim ol sumatin i kam bek gen long skul long stap nating na bihainim laik bilong wan wan long kamapim protes na bagarapim propeti bilong gavman na yunivesiti.

“Planti sumatin bai pinisim gret 12 na kam aut neks yia. Mipela i laikim ol dispela sumatin i gat sans long kisim yunivesiti edukesen,” Mista O’Neill i tok.

UPNG kaunsil i tok ol wok long senisim kalenda bilong skul na mekim ol samting long larim ol sumatin i kam bek na statim skul long mun Septemba long dispela yia.

Mamose rijon redi long Jayapura tred fea

James G. Kila i raitim

MAMOSE Gavanas Kaunsil Seketeriat i salim tok save i go aut nau long long olgeta lain husat i gat intres long stap insait long Mamose Papua Investmen So na Tred Fea long Jayapura, Indonesia long mun Oktoba.

Dispela so na tred fea bai givim sans long long Mamose rijon long go na soim wanem samting ol i kamapim long Jayapura long Oktoba 3 i go 10 long dispela yia.

Mamose Sekretariat i tokaut olsem ol salim pinis tok save pepa long ol lain husat i gat intres long redim ol yet gut pastaim long mun Oktoba long go long dispela so na tred fea



Madang Gavana Jim Kas

long Jayapura.

Invitesen i go long wan wan intres grup, komyuniti grup, praiwet ogenaissen, gavman institusen, ol bisnis haus na sios grup husat i laik soim ol prodak na sevis bilong ol long dispela so na tred fea.

Mamose Gavanas Kaunsil aninit long sia-man bilong Madang

Gavana, Jim Kas i go pas long dispela wokabout long givim sans long bisnis komyuniti na sosio-ekonomik grup long Mamose rijon olsem Madang, Morobe, Is Sepik na Sandaun long lukluk long sampela rot long kisim sapos na helpim na tu skul long wok bisnis long indatastri bilong Indonesia na tu sans long kamapim tred na wok bisnis.

Program ya i lukluk tu long strongim ol sosio-ekonomik grup long kirapim wok bisnis long wokim mani na rot long daunim pasin bilong stap rabis na apim standet bilong stap bilong ol manmeri na welfea bilong ol pipel long Mamose rijon.

Sir Mekere i tok O’Neill no tok tru long Ok Tedi

I kam long pes 1

Praim Minista i bin mekim 5-pela tok:

PNGSDP i laik pinisim Ok Tedi Main

Ross Garnaut, bipo sia-man bilong OTML na mi i tok long Praim Minista i mas kisim ples na lukautim Ok Tedi

Mak mani bilong Ok Tedi long taim Praim Minista i kisim Ok Tedi (Septemba 2013) i stap daunbilong long \$US500 milien

Ok Tedi i lusim mani olgeta de taim PNGSDP i lukautim; na

Ok Tedi i gat dinau olsem \$US200 milien.

Sir Mekere i tok dispela ol tok tok i no tru olgeta.

“Mi o Profesa Garnaut i no bin tok long main i mas pas. I no gat tingting na toktok bilong pasim main, tasol taim PNGSDP i stap seaholda, Ok Tedi na PNGSDP i investim planti milien dola long Main Laip Ektensen projek long lukim Ok Tedi i go moa long taim ol i bin makim long pasim main long 2015,” Sir Mekere i tok.

Sir Mekere i tok em yet o Profesa Garnaut i no bin tok long Praim Minista i mas lukautim Ok Tedi.

“Em Praim Minista yet i bin kamap long PNGSDP long wanpela pas em i raitim long 2 Mas, 2013, we i tok olsem, “Indipenden Stet ov Papua Niugini i redi long toktok wantaim PNGSDP nau long

baim ol sea em PNGSDP i gat long Ok Tedi Maining Ltd”.

Sir Mekere i tok veliu bilong Ok Tedi long taim bilong ekspropriesen (Septemba 2013) i winim tripela taim veliu o mani mak bilong \$US500 milien we Praim Minista O’Neill i tok long en, na main em inap long kamapim bikpela winmani.

“Main i no wok long lusim mani olsem Praim Minista i tok long en.

OTML i no lusim mani – Em i wanpela kampani we i save mekim bikpela winmani na i save ran gut aninit long lukaut bilong PNGSDP,” Sir Mekere i tok.

OTML odit fainensel stemen bilong 2012, em laspela yia long taim PNGSDP i bin stap seaholda, i soim olsem Ok Tedi i bin gat K2.66 bilien long net aset bilong en; em i no bin gat dinau; na kampani pre-tax profit o profit pastaim long ol i rausim takis long 2012 em i K1.26 bilien.

Sir Mekere i tok OTML i no bin gat dinau taim PNGSDP i bin holim moa sea na i no bin i gat dinau long \$US200 milien taim Mista O’Neill i eksproprietim main.

“OTML i bin gat inap kes mani long putim long operesen bilong en na ol narapela eksploresen na ekspensen bilong Main Laip Ektensen,” Sir Mekere i tok.

Las wik Trinde long

Palamen, Mista O’Neill i tok ol gavman i mekim gutpela disisen taim em i tekova long OTML.

“Wanem samting gavman i mekim i no rong. Gavman i putim pipel i go pas. Gavman i winim tripela kot long Singapore, Washington (Amerika) na long Pot Mosbi,” Mista O’Neill i tok.

Mista O’Neill i tok Sir Mekere i bin Praim Minista taim, em i bin helpim BHP Billiton, husat i pastaim opereta bilong Ok Tedi, long abrusim kot long bikpela bagarap main i bin mekim long bus, graun na wara long Westen Provins.

“Sir Mekere i bin yusim Palamen long kamapim wanpela lo. Dispela lo i bin helpim BHP long abrusim kot salens na statim PNGSDP, we em i kampani bilong Singapore, i no PNG,” Mista O’Neill i tok.

Em i tok taim em i kamap Praim Minista, em i rausim dispela lo na larim gavman i tekova long main.

Mista O’Neill i tok nau ol papagraun bilong Ok Tedi, manmeri bilong Westen Provins husat i stap arere long Fly River na Westen Provinsal Gavman i ken kotim BHP Billiton long bikpela bagarap bilong bus, graun na wara main i bin mekim taim dispela maining kampani bilong Australia i bin operetim Ok Tedi.

Memba i laikim wokbung long provins

MEMBA bilong Kikori, Mark Maipakai, i tok liklik mani em i save kisim long Distrik Sevis Impruvmen Progem (DSIP) i save go long helpim ol manmeri bilong distrik bilong em.

Mista Maipakai i tok Kikori Distrik i no save kisim mani long Galp Provinsal Gavman bikos tupela Maipakai na Gavana Havila Kavalo i birua long politikis.

Em i laikim Gavana bilong Galp, Havila Kavalo, i wokbung wantaim em long kirapim provins.

Mista Maipakai i tokaut stret long Palamen long las wik olsem politikis na pasin bilong kamapim birua i no ken kamap long Galp Provins bikos ol pipel i wok long kisim hat taim long sevis taim ol lida i save kros na pait.

“Distrik bilong mi i bin baim sampela bot long seviim ol manmeri. Tasol dispela ol bot i stap yet long Pot Mosbi long banis bilong mi,” Mista Maipakai i tok.

Mista Maipakai i tok Kikori distrik i bin baim sampela bot tasol dispela ol bot i nidim mani long mekim registresen na arapela samting.

Tasol Galp Provins i no gat mani long mekim ol dispela wok.

Mista Maipakai i tok olgeta bot em i bin baim long DSIP mani i stap yet long banis bilong em.

“Mi no sasim mani. Sapos mipela i putim dispela ol bot long banis bilong PNG Ports, ol bai sasim bikpela mani,” Mista Maipakai i tok.

Em i tok Galp Provins i save gat bikpela mani tasol dispela mani i no mekim wanpela gutpela samting long senisim laip bilong manmeri.

“Mipela i save kisim IDG (Infrastraksa Developmen Gren) na MoA (Memorandum ov Agrimen) mani. Em i milien kina mi tok long en, na em i bikpela mani tru,” Mista Maipakai i tok.

Paipain bilong oil bilong Kutubu na ges bilong PNG LNG i ran long Kikori. Kikori distrik i save kisim IDG na MoA mani long dispela tupela paipain.



Wantok niuspepa i laikim ol eijen insait long Madang, Kimbe, Kundiawa, Wewak, Jiwaka, Tari, Kiunga, Tabubil, Daru, Kerema, Manus, Kavieng na Alotau long salim niuspepa bilong mipela.

Mipela i laikim ol Eijen long distributim niuspepa long dispela ol ples antap hariap tru!

Sapos yu ting yu em rait man o meri long dispela wok, ringim Sekulesen Supavaisor bilong mipela long Fon: **325 2500 o Mobail namba: 7384 6688 o email i kam long: seovo@wantokniuspepa.com**



PIH Saveman Nius

"I kam long Pacific International Hospital Port Moresby"

Ph: 311 3000 and 799 88000 Website: www.pihpng.com

Cut-less Laser Kidney Stone Removal

The first time in PNG – PIH once again, delivering advanced healthcare

What is it?

Percutaneous Nephrolithotomy (PCNL) is the preferred technique for treating large stones (over 2cm in diameter) within the kidney. It involves keyhole surgery performed through a 1cm incision in the skin overlying the kidney



The laser endoscope being targeted at the kidney stone

What are the advantages?

Allows large or complicated stones to be treated in a minimally invasive fashion, where in the past this would have necessitated a large skin incision.

Hospital stay is 3-4 days, and out of hospital recovery time is significantly shorter than traditional open surgery.

What are the disadvantages?



Compared to traditional treatments of large complex stones, there are no disadvan-

tages. Improved techniques and equipment have allowed this type of surgery to be safer than ever before.

What preparation is required?

You will be required to have detailed imaging to allow the surgeon to assess the stone in fine detail regarding its relationship to the kidney and nearby structures. This will enable the surgeon to plan the best access point(s) to the kidney to allow effective clearance of stones.

As the procedure is performed under general anaesthesia, you should have nothing to eat or drink for 6 hours prior to treatment. Regular medications can be taken with a sip of water with the exception of blood thinning agents (eg. warfarin, aspirin, clopidogrel) or non-steroidal anti-inflammatories which need to be stopped for 7-10 days. A mid stream urine (MSU) test is required to ensure the urine is sterile before treatment is undertaken. Other tests required include urine culture, kidney function studies, and complete blood counts. These tests will all be organized from the rooms after your consultation.

What are the risks?

This form of surgery is low risk if performed by an urologist who is specifically trained in this technique, and aided by meticulous pre-operative planning. The specific risks are uncommon but include infection, excessive bleeding (necessitating blood transfusion 2%, embolisation 1%, renal exploration

0.5%), and adjacent organ injury (spleen, liver, bowel, and lung).


What do I need to bring to surgery?

All related available imaging such as KUB (kidneys, ureter, and bladder) x-ray, CT scan abdomen, or kidney ultrasound

Your usual medications

What happens in the operating room?

The operation is performed under a general anaesthetic and lasts approximately 2 to 3 hours. It is a team effort requiring coordination between surgeon, anaesthetist, radiology and nursing staff. You will be positioned on the operating room table lying on your front "stomach" for the duration of the surgery. The procedure is accomplished with the assistance of x-ray imaging to guide entry of a 1cm tube into the kidney. This provides access into the kidney drainage system allowing telescopes and instruments to visualize, fragment and remove stones. A drainage catheter (nephrostomy tube) which exits through the skin is left in the kidney at the end of the procedure.



PCNL – described diagrammatically

What to expect afterwards?

You will have a temporary catheter called a nephrostomy tube draining the kidney, as well as a urinary catheter in-situ. They will be removed prior to discharge from hospital. The urine will be bloodstained for up to a week after discharge from hospital. Imaging is performed immediately after surgery to assess stone clearance. Occasionally, further minor surgery is required to clear any remaining stones to achieve complete stone clearance. Your hospital stay will be 3-4 days on average.

Follow-up

You will be required to take it easy during the recovery phase for several weeks. There should only be minimal discomfort from the wound. Oral antibiotics will be given for a further five days to prevent infection. It is important to inform us if you feel unwell with fevers, chills, or develop heavy bleeding in the urine. Your initial follow-up will be in 6 weeks after discharge. Occasionally, a urinary stent is left to ensure the urine drains correctly into the bladder. This will require removal at a later time.

PIH is Port Moresby's largest private hospital offering more than 14 specialities under one roof, with specialists and technologically advanced equipment being utilized to bring modern healthcare to PNG. PIH is the only hospital in Papua New Guinea to conduct the modern PCNL – 'cut less' laser kidney stone removal. Call us at

71 55 88 66 to confirm an appointment with overseas urology specialist, Dr Lionel.

If you have any further queries about kidney care or urology, please feel free to email us at info@pihpng.com or simply walk in and ask to be shown around the new facility.

Disclaimer: The information available on this feature related to images, graphics, text and other content is available for educational purposes only. Seek the advice of your doctor in respect to questions on a medical condition or treatment and do not disregard the doctor's professional advice after reading information in this feature.



Reference : <http://www.gosh.nhs.uk/medical-information-0/procedures-and-treatments/endoscopic-removal-kidney-stones>
<http://www.kidney-stoneclinic.com.au/>



SAY NO TO KIDNEY STONES : CUT-LESS LASER TECHNOLOGY
The first time in PNG - PCNL now available at PIH, 3 Mile

PIH has invited an overseas specialist in Urology to screen and treat urological disorders

PCNL : Percutaneous Nephrolithotomy

TURP

Kidney Function Test

Dialysis

to pre-book
call us, today
71558866



Pacific International Hospital : Sec 105, Lot 2, Taurama, 3 Mile, Port Moresby, PNG, Ph: 799 88 000
PIH Clinic : Ground Level, Vision City Mega Mall, Waigani Drive, Port Moresby, PNG, Ph: 7100 2873
info@pihpng.com | www.visioncity.com.pg | www.pihpng.com | www.facebook.com/pihpng @pihpng



Ol IBS Sentral sumatin i kisim skolasip

Charlpetson Koi i raitim

mani long menesmen bilong IBS.

Dispela inisitiv i bin stat long 2013 we olsem 69 institusen i kisim helpim long en.

Deputi Gavana, Desmond Baira, i givim sek mani olsem K167,800 long helpim ol 84 Sentral sumatin husat i long IBS.

"Gutpela Gavana bilong mipela i mekim isi long ol papamama long sapatim ol long baim skul fi bilong ol pikinini bilong ol. Em i raitim sek mani bilong K167 800 we i bai go long ol namba wan

hap bilong ol 84 sumatin na namba tu bai olsem 60 sumatin bai kisim bihain taim ol i stretim ol pepa pinis," Mista Baira i tok.

Mista Baira i tok olsem ol i bilip olsem dispela skolasip bai i helpim ol na bai ol i ken pinisim skul gut long IBS na painim wok.

Long wankain taim, IBS Eksekutiv Dairekta, Edward Silva, i tok olsem Papua Niugini i pulap long bikipela ol risos.

"Olsem 80 pesen bi-

long kantri i karamap long bikipela bus. Tasol, kantri i nidim ol human risos long wok long ol dispela planti risos," Mista Silva i tok.

Long dispela, Mista Silva i tok IBS i laik helpim long sapatim ol sumatin long skul gut na mekim dispela wok.

Mista Silva i tok tenkyu long Gavana bilong Enga, Sir Peter Ipatas long helpim ol sumatin long IBS long Enga na Gavana Kila Hoada long Sentral provins.

OL 84 sumatin long Institut bilong Bisnis Stadis (IBS) bai i kisim skolasip long baim tuisen fi bilong ol.

Gavana bilong Sentral, Kila Hoada i kamap wantaim dispela tingting bilong helpim ol papamama i save stap long ples o rurel hap.

Long las wik Tunde, Deputi Gavana bilong Sentral provins i makim maus bilong Gavana Kila Hoada i go long IBS long givim sek

IBS bai gat nupela program

Charlpetson Koi i raitim

Sampela ol skul insait long kantri nau i gat nupela program na IBS tu bai i statim nupela digri program bilong en long neks yia.

Mista Silva i tok, "IBS i kisim tok orait long Haia Lening Institutusen long kirapim dispela 4-pela yia digri program."

"Bai ol dispela program i stap insait long 4-pela hap em, Akaunting na Fainens, Bisnis Menesmen, Ikonmik na Dvelopmen na Infomesen Teknoloji," Mista Silva i tok.

Em i tok IBS i save lainim ol sumatin long level bilong Australia we ol i bung wantaim Sauten Yunivesiti Kaunsil.

INSTITUT bilong Bisnis Stadis (IBS) i lukluk nau long kamapim ol nupela program long 2017.

Eksekutiv Dairekta bilong IBS, Edward Silva, i mekim dispela toktok las wik long taim Sentral Provinsal gavman i go givim skolasip mani bilong ol Sentral sumatin.

Gavman i helpim UPNG

Charlpetson Koi i raitim

Ol sumatin long Yunivesiti bilong Papua Niugini (UPNG) bai i go bek long skul bihain long yunivesiti kaunsil i mekim dispela disisen long las wik.

Dispela disisen long sevim ol yunivesiti i bin kamap long taim nupela Minista bilong Haia, Edukesen, Risets, Sains na Teknoloji, (HERST) Francis Marus, i bin tokaut long taim em i kisim wok.

Bihain long kain kain toktok i kamap yunivesiti kanusil i kisim tok orait long yunivesiti senet na i tokaut olsem skul bai stat

long Mande, Septemba 5 long dispela yia long Tau-rama na Waigani kempas wantaim.

UPNG Ekting Sansela, Dokta Nicholas Mann, i tok disisen bilong kaunsil i kamap long gutpela taim long kisim fainensel sapat long gavman, na mani bilong stretim sekyuriti long yunivesiti.

"Nesenel Eksekutiv Kaunsil disisen namba 172/2016 i tok orait long givim K12 milien long helpim yunivesiti long kisim ol akademik program bek, na bungim ol narapela kost, olsem sekyuriti na stretim ol bagarap i kamap long ol propeti bilong yuni-

vesiti," Dokta Mann i tok.

Ol UPNG sumatin bai go bek skul gen. Ol i bin protes, na stopim ol klas long yunivesiti long lainim samting.

Ol sumatin i stopim klas na laikim Praim Minista long lusim wok bilong Praim Minista. Planti samting i bagarap na ol sumatin na woklain i no pilim seif moa. Dispela i bin go het long 8-pela wik.

UPNG kaunsil i kisim toktok long UPNG Senet, gavman na ol narapela stekholda long pasim skul long Julai 5. Nau bai skul i op gen long Septemba 5.

Ol i holipasim wanpela man i smaglim drag



(Long rait) Aresting Opisa, Konstabol Terence Mana bilong MS 07, Aipo Moses, husat i smaglim drag na lo na oda komiti memba i soim ol drag ol i bin kisim na i sanap long Paiam Polis Stesen.

WANPELA man husat i save hait na kisim drag i go i kam long Porgera, Enga Provins, em ol polis ol i bin salim i go long Porgera Operesen (PO16) i holipasim em na lokim long Paiam Polis Stesen long em i save hait na kisim drag i go long Porgera.

PO16 Kontinjent Komanda Sif Inspekta, Nelsen Chanei, i tok olsem ol Mobai Skwat 07 memba i holim dispela saspek long Maip Bunm Get long Tunde Ogas 9, 2016.

Ol i bin painimaut olsem saspek, Aipo Moses, bilong Maip viles i karim wanpela bek na i wokabout i go insait long get na i traim long kalap long wanpela kar i wet i stap.

Mista Chanei i tok, saspek i no stop bilong ol polis long sekim em na i ran i go insait long bus. Ol polisman i bihainim em i go na holim em wantaim wanpela 10kg rais beg i

pulap wantaim 3kg maruana.

Ol polis i holipasim em na saspek i tok stret long ol polis olsem narapela drag dila long La-iagam i baim em wantaim K100.00 na dispela em i namba tri taim bilong em long karim drag i go insait long dispela get.

Ol i bin sasim em long em i save saplaim drag. Narapela man husat i save smokim drag em ol CID long Pot Mosbi i go long Porgera Operesen i lokim em long brukim lo bilong kot oda..

Em i wanpela man saspek i gat 19 krismas bilong Panada viles long Porgera em ol polis i bin holipasim em long Yoko 1 viles insait long main eria taim em i bihainim mama bilong em husat i save wok long Barrick Gold Limited.

Ol i bin kalabusim dispela saspek long holim drag long Me 10, 2016, tasol Porgera Distrik Kot i

rausim 12 mun hat leiba kalabus taim bilong em na i odarim em long sainim wanpela 24 mun Gutpela Bihevia Bond bikos em i wanpela gret 10 sumatin long Porgera Hai Skul.

Tasol, saspek i no bihainim lo bilong kot oda na ol i holipasim em gen na sasim em long em i go insait long dispela eria.

Long wankain taim, Komanda Chanei i tok strong long ol pipel na komyuniti long Lagaip Porgera Distrik long ripot long ol lain husat i dil wantaim ol drag na hombru.

Em i tok tambu olsem ol dispela kain nogut pasin i kamapim planti lo na oda asua insait long sosaiti na dispela i mas stop.

Chanei i tok, i gat planti trabel i kamap long alkohol na sanguma toktok insait long eria na dispela i mas senis, sapos ol pipel i laik lukim developen.

TOKAUT NAU!!

Special Features and Supplement

The best way to get the information to the mass populace in PNG and get it delivered right into the remotest villages by publishing in Tok Pidgin "Wantok niuspepa".

Get the grassroots people involve in taking ownership of developments in business, Health, Education, Politics, Agriculture, Climate Change, Banking, Law Order and more etc.

Wider distribution networking in the country using the four mainline churches (Catholic, Lutheran, Anglican and the United Church of PNG) Wantokniuspepa goes to remotest places and villages where other news papers don't reach.

Very affordable advertising rates, longer shelve life and many more pass on readership.

Your special events, achievements, product, services or information can be read, call us now!

Ph: 325 2500 Fax: 325 2579

Email: lbents@wantokniuspepa.com Mobile: 75530581
tekari@wantokniuspepa.com Mobile: 71963704
sfarapo@wantokniuspepa.com Mobile: 76622895
 Advertising Mobile: 73846688

Ol polis i brukim lo holimpasim na sasim ol

OL i holim pasim wanpela senia polis opisa na sasim em long givim aut polis yuni-fom, wanpela gan na ol bulet long wanpela man nating long Pot Mosbi.

Asisten Komisina bilong Kraim, Victor Isouve, i tok, Komanda bilong Siks Mail Polis Stesen, Senia Inspekta Fred Bare, em ol i bin holim pasim na sasim bihain long Ogas 9, bihain long Boroko Distrik Kot i salim wanpela man i go long kalabus inap long tripela mun wantaim hat lebabikos em i bin kamap olsem polisman.

ACP Isouve i tok, nem bilong man husta kot i bin kalabus em, Scott Dylan, bilong Bogenvil i bin holim gan na werim ol polis yuni-fom, na i kamap olsem polisman taim ol polis long 6 mail i holimpasim em long stat bilong dispela yia taim.

Kot i bin kalabusim Dylan bihain long ol i painimaut

olsem em i no polisman. Dylan i bin go long kalabus i strongim ol ditektiv long mekim wok painimaut na ol i holim Senia Inspekta Bare long em i bin givim ol yuni-fom, gan na ol bulet.

Isouve i tok moa olsem ol i bin holim pasim narapela polisman na sasim em tu long Alotau, Milen Be Provins, long Ogas 7, long em i no bin mekim wok bilong em.

Isouve i tok, ol i bin givim wok long polismeri husat i save wok aninit long Intenel Investigesen Yunit long mekim wok painimaut long rep kes egensim polisman, Danley Kotapu, tasol em i no mekim wok bilong em.

Em i tok moa olsem ol kompleina i putim ripot long Alotau polis bihain long Kotapu i repim wanpela skul meri long Ogas 2015, tasol Konstabel James i no mekim wok bilong em.

Ditektiv long Pot Mosbi i bin go long Alotau long mekim wok painimaut long sampela kes i stap yet. Long wankain taim, Provinsal Polis Komanda bilong Milen Be, Sif Suprintenden Joseph Morehari i givim ol fail long ol ditektiv na ol i bin painimaut na holim pasim Konstabel James na sasim em long em i no bin mekim wok.

Ol i bin holim pasim Konstabel Kotapu tu long em i brukim lo aninit long seksual kraim egensim liklik meri.

Isouve i tok, ol i holim pasim ol polis pesenel i soim olsem menesmen bilong Royal Papua Niugini Konstabuleri i laik rausim ol gras nogut insait long ogenaesen yet.

Em i tok, ol bai mekim ol stronpela eksen long rausim korapsen insait long ogenaesen long strongim pablik.

Ol i bin ripotim 7-pela kraim long kantri

WAN wan de Kraim samari ripot i kam long Opis bilong Deputi Komisina bilong Polis na Sif bilong Operesen, Jim Andrews, olsem ol polis i holimpasim 9-pela lain long ol 7-pela kraim ol i bin ripotim long Tunde, 09 Ogas, 2016.

Ol 7-pela kraim em, wanpela stil pasin i kamap long ol giaman lain, tupela roberi, wanpela rep, wanpela seksual penetresen, wanpela ranawe i kamap long kalabus na wanpela long kilim man i dai.

Wanpela kraim em ol i bin ripotim long Westen Hailans Provins, wanpela long Manus, 5-pela long Nesenel Kapitel Distrik na wanpela long Oro Provins.

Kraim i bin kamap long Ailans Komand em long Manus Provins we i gat giaman lain i bin kisim mani na yusim long rong hap. Dispela asua i kamap long Desember 8, 2015 long Lorengau.

Ol i bin ripot olsem man husat i stilim mani em Hon Awai Pana bilong Onnei Viles long Wuvulu Ailan long Lorengau we i bin yusim posisin bilong em olsem Lokal Level Gavman (LLG) presi-

den bilong Wuvulu na long stilim K92,404.41 bilong Distrik Dvelopmen Atoriti mani bilong ol skul.

Awai i pretim Distrik Tresa long raitim sek na dipositim dispela mani i go insait long benk akaun bilong em na em i yusim long ol wok bilong em yet.

Ol i bin holimpasim Awai na sasim na i lokim em long Lorengau Plis sel. Em i weit long em bai sanap long kot.

Narapela kraim ol i bin ripot long Nesenel Kapitel Distrik em long roberi na kilim man i dai. Dispela hevi i bin kamap long Sande Ogas 7, 2016 namel long 7:00 moning na 7:30 moning long Manu Auto Pot, Korobosea.

Kompleina bilong dispela kraim, Sumon Islam, i tok olsem 6-pela saspek i go insait long eria bilong Good Link Supamaket kampani na i holim tripela man. Tupela man bilong Bangladesh na wanpela bilong Lake Kopiago, Hela Provins. Ol Saspek i stilim K20, 000 kes mani fleks kad mak long K10, 000.

Man PNG em ol i bin kilim i dai na tupela man long Bangladesh i kisim bikpela bagarap long bodi bilong tupela. Ol polis i mekim wok

painimaut long dispela.

I gat narapela asua i bin kamap long Nesenel Kapitel Distrik em i rep. Dispela asua i kamap namel long Ogas 2 na 3, 2016 long Gerehu Stej Wan.

Kompleina em i wanpela meri long Sopas viles long Wabag, Enga Provins, i ripot olsem pikinini meri bilong em i gat 16 krismas i go aut na dring wantaim saspek, Andrew Eben, man long Nad viles long wabag, Enga.

Eben i repim em taim em i slip bihain long dring. Polis i mekim wok painim aut long dispela na ol i no holimpasim em yet.

Wanpela asua i bin kamap aninit long Seksual Penetresen em long Nesenel Kapitel Distrik.

Long Mande Ogas 1, 2016 namel long 11:30 apinun na 12:00 mid nait, wanpela bipo PNG Difens Fos memba i repim kompleina long Goldie Trening Dipot. Saspek i weitim fainel entaitelmen bilong em na taim em i wetim dispela mani, em i givim sampela mani long viktem na slip wantaim em. Saspek i hait na ol polis i mekim wok painim aut yet.



PNG Air

CENTRAL RESERVATIONS

Phone: + 675 7222 2151 | Fax: + 675 325 4867
DIGICEL TOLL FREE NUMBER 16111 | Email: reservations@pngair.com.pg

STEAMSHIPS sapotim yet YWAM Medikal Sip

STEAMSHIPS Trening Kampani i bin givim wanpela sek mani long mak bilong K100,000 i go long YWAM Medikal Sips long las wik olsem wanpela hap bilong sapot bilong ol olgeta taim i go long YWAM Medikal Sip i mekim wok insait long Sauten rijon na Huon Galp eria bilong Papua Niugini.


Steamships Trening Kampani i bin wanpela strongpela sapota bilong YWAM Medikal Sips stat long 2011, wantaim mani long mak bilong K2 milien, na tu bikpela tru long ol samting ol i givim bilong sapotim wok na long lojistik sapot.

YWAM Medikal Sip Menesing Dairekta, Ken Mulligan, i tok Steamships i bin opim rot bilong YWAM Medikal Sip long go bikpela.

“Steamships i bin wanpela ki faundesen patna husat i bin putim bikpela samting long kamapiim ol gutpela wok we planti handet pipel long ol rurel ples i kisim helpim long las siksipela yia i go pinis.

“Mipela i gat bikpela tok tenkyu i go long Steamships long ol i wok long helpim mipela yet,” Mista Mulligan i tok.

YWAM Medikal Sips i lukim patnasip bilong en wantaim Steamships i go moa long maritaim trening program. Long taim bilong MV YWAM long PNG wanpela wok wantaim dispela trening program em i bin kisim 4-pela Consort kedet long wok trening wantaim YWAM Trening na Medikal Sip, MV YWAM PNG inap long 18 wik long kisim sampela eksperiens long wak long solwara olsem hap bilong maritaim trening bilong ol.



Steamships Trening Kampani Jeneral Menesa bilong Koporet Afeas, David Toua i givim piksa bilong sek mani i go long Menesing Dairekta bilong YWAM Medikal Sips na Trening, Ken Mulligan long las wik.

Ol 4-pela kedet i sapotim wok bilong MV YWAM PNG taim ol i wok wantaim ol dek opisa bilong YWAM, ol dekan na ensinia, na long sem taim ol i kisim save long wok.

Steamships Trening Kampani Jeneral Menesa bilong Koporet Afeas, David Toua i tok olsem kedet program em i hap bilong patnasip wok wantaim YWAM Medikal Sips.

“Wok antap long MV YWAM PNG em i narapela kain eksperiens bilong ol kedet bilong mipela. Ol i kisim nambawan sans long wok wantaim ol lain i gat eksperiens long wok long planti solwara na long sem taim sapotim heltkea sevis deliveri long rurel eria.

“Em ol dispela kain nupela wok i go wantaim ol veliu bilong mipela olsem wanpela kampani, na patnasip bilong mipela wantaim

YWAM Medikal Sip i givim mipela narapela gutpela rot long investim mani i go insait long wokfos bilong PNG na maritaim indastri. Mi gat bikpela amamas long givim han wantaim dispela liklik moa mani llong sapotim wok,” Mista Toua i tok.

Bihain long 5-pela gutpela mun bilong wok we i bin pinis long mun Jun 2016, MV YWAM PNG nau i stap long sevis olsem Stes 3 bilong

mekim em i kamap Medikal Sip tru. MV YWAM bai kam bek long PNG solwara long mun Oktoba dispela yia na bai wok narapela 7-elan mun moa long Sauten Rijon na Huon Galp.

Long stat bilong yia 2016, MV YWAM PNG na ol tim volandia bilong en i bin bringim heltke na trening i go long 27,000 pipel long 171 ples.

NAQIA bai sekim ol marasin bilong enimal

NESENEL Egrikalsa Kwarantin Inspeksen Atoriti (NAQIA) bai wokim wanpela bikpela wok bilong sekim ol marasin bilong ol enimal na ol famasutikal we ol dokta bilong enimal i save yusim long helpim ol enimal long kantri.

NAQIA i raitim pinis pas i go long ol impota, distribut na ol dispensa bilong ol veterineri marasin (marasin bilong enimal) na ol famasutikal insait long PNG long ol i mas givim taim bilong ol long dispela ekseais we bai kamap long olgeta hap bilong kantri.

Menesing Dairekta, Mista Joel Alu i tok wok bilong yusim ol marasin bilong enimal na ol famasutikal em i impoten long helt na welfe bilong ol

pet o enimal bilong haus na ol enimal we ol man i save kaikai.

Em i tok tasol taim ol dokta i no yusim gut ol dispela marasin, em i ken mekim planti kemikal i stap insait long mit bilong ol enimal na bai kamapim banis long ol marasin bai i no inap moa wok long bodi bilong ol enimal, na dispela bai kamap birua long ol helt bilong ol pipel.

Olsem wanpela steturatori veterineri atoriti, NAQIA nau i wok long sekim ol wanem kain marasin na ol famasutikel i stap we ol enimal na laipstok sekta long PNG wantaim patnasip bilong Nesanel Dipatmen bilong Helt, aninit long Nesanel Marasin Polisi 2014.

Mista Alu i tok long pas

bilong em i go long ol patna olsem: “Olsem wanpela impota, distribute o dispensa bilong veterineri marasin na famasutikal, yu em impoten patna insait long dispela wok, olsem na mi laikim yu long wok gut wantaim mipela.”

Em i tok strong olsem dispela beslain sevei i laik kamapim save long wanem kain ol marasin na famasutikal i wok long kam insait long PNG, stua na ol i wok long go aut. Em i laik save long hamas tru na ol enimal na ol fama o haus lain i yusim olsem wanem.

Seksen bilong veterineri insait long NAQIA teknikal sevis divisen bai wokim dispela sevei na ol i redim wanpela kwesten pepa pinis.

Isikiel givim K100,000 long sapotim Wol Vision wok

Paul Zuvani i raitim

MARKHAM distrik i amamas long ol projek Wold Vision i kamapim, memba bilong Markham na Minista bilong Haus Paul Isikiel i tok.

Isikiel i mekim dispela tok taim em i givim K100,000 mani long sapotim wok bilong Wol Vision long distrik.

Wantaim K100,000 mani Memba i sainim tu MoU long givim wankain mani mak long sapotim wok bilong Wol Vision.

Em i givim dispela mani na sainim tok orait long opis bilong Wol Vision long Pot Mosbi aste.

Mani Wol Vision i kisim i namba tu mani bihain long em i kisim wankain mani mak long 2014.

Isikiel i tok em bai givim K100,000 bilong



(L) World Vision Kantri Program Dairekta, Heather McLeod na Marhkam MP, Paul Isikiel i sainim MOU na Markham District CEO, John Orebut i wet long taim bilong em long sain. Poto: World Vision PR yunit.

2016 long bihain taim liklik.

Em i tok em i amamas long wara projek Wol Vision i mekim long distrik na nau inap long 6000 manmeri i kisim dispela sevis.

“Dispela em sapot bilong wara projek tasol long bihain taim mipela bai lukluk long sapotim ol narapela projek we Wol Vision i kamapim,” Isikiel i tok.

I gat ol arapela projek olsem long wok bi-

long sapotim ol meri na pikinini long sait bilong helt na long skul wantaim.”

Stat long ol liklik samting senis i save kamap,” em i tok.

Long taim bilong sainim tok orait, kantri program menesa bilong Wol Vision Heather Macleod i tok tenkyu long Minista long sapot bilong em.

Macleod i tok MoU i kamapim luksave bilong wok bung wan-taim Vol Vision na

Markham distrik edministresen.

Wantaim dispela luksave tupela i ken go het long kamapim WASH (Wara na San-itesen na Haijin) program.

Em i tok tupela i ken karimaut tu metenel na bebi helt na nutrisen (MNCHN) na disasta risk ridaksen (DRR) program aninit long Wol Vision wok program long Morobe.

“Wol Vision i laik



Yam i Gat Wanem Skul Long Yumi?

Plantu bilong yumi i no moa save long yam. Taim yumi harim nem bilong yam yumi save skin dai nogut tru long wanem yumi tingim olgeta hatwok bilong wok yam.

Yam em i no pasin bilong wok gaden tasol. Em i wanpela sistem bilong yumi Papua Niugini stret.

Long taim yam i redi plantu wok bilong kastom i save kamap. Yam i save givim biknem long man i gat plantu yam na inap skelim na holim pasim komyuniti bilong em long taim bilong bikpela hangre.

Yam i skulim yumi long pasin bilong serim na pasin bilong sindaun isi wantaim.

Nau long dispela taim ol yangpela bilong yumi i save go skul long ol yunivesiti long kisim save bilong wok egrikalsa. Ol i save lainim plantu samting na pasin bilong ol arapela lain long groim kaikai na ol arapela samting.

Kaikai em i wanpela namba wan wok bilong yumi olgeta manmeri.

Ol lain i mekim wok yam i save bihainim wanpela kalenda bilong yam yet. Ol i save stat planim yam long taim bikpela san i laik pinis na klostu tasol long taim bilong ren.

I gat ol sain long ol rif na long ol diwai na wara i save soim ol em i taim bilong planim yam nau. Long taim yam i redi ol sain long bus, Solwara na wara bai i tok-save olsem em i taim bilong kamautim yam.

Insait long gaden ol pikinini i save kisim skul long nem bilong wan wan yam, long pasin bilong wan wan yam, wanem kain graun wanem yam i laikim, wanem yam ol i ken kaikai na wanem yam em i bilong wok kastom, wanem yam ol i mas putim olsem sid bilong planim gen na plantu moa save. Insait long olgeta dispela skul em i soim bikpela save i kam long mekim wok na liklik i save kam long taim fama na pikinini i save sindaun na skelim wok bilong ol.

Long taim ol i kamautim yam pinis long gaden ol fama i save mekim kaikai bilong tok tenkyu long ol spirit long givim plantu gupela yam.

Ol fama i luksave gupela kaikai i no kam long hatwok bilong ol tasol, nogat. Ol i save taim ol i putim yam sid long graun na mekim liklik prea bilong ol, ol spirit bilong gupela kaikai i save wok bung wantaim graun long kamapim gupela kaikai.

Olsem na taim ol i rausim yam long graun ol i mas tok tenkyu long olgeta lain i wok bung wantaim ol; ren, san, win, ol spirit, na graun yet.

Wok bilong skelim yam i save kamap long dispela taim long luksave long husat em i nambawan man tru bilong groim yam insait long ples na komyuniti. Long dispela taim tu ol i ken semim husat man em i no groim gupela yam bikos em i soim olsem em i les.

Yumi skelim sindaun bilong yumi tude long sistem bilong mani. Plantu yumi i filim hevi tru long serim mani bikos i nogat inap. Long taun yumi mas baim olgeta samting long mani.

Yumi skelim tu edukesen sistem bilong yumi bilong wanem na yumi gat plantu pikinini i no save win long skul?

Ating sampela gupela tingting i stap insait long pasin bilong wok yam.

Edukesen sistem bilong ol ausait pipol i laikim yumi ritim plantu buk na pepa. Sistem bilong yam i toktok long mekim na kisim save.

Yes long dispela taim rit na rait em i bikpela samting, na olsem wanem yumi inap bungim tupela sistem ya?

PNG-Australia Bung Wantaim-Yumi Poroman esei wina

AUSTRALIA Hai Komisen long Papua Niugini i amamas long tokaut long ol wina bilong dispela yia, PNG-Australia Bung Wantaim-Yumi Poroman esei kompetisen bilong ol skul long Nesenel Kepital Distrik (NCD).

Jeffrey Odongo, wanpela Gret 10 sumatin bilong St Joseph Intenesenel Katolik Koles i winim wanpela liklik kompiuta long winim esei, taitel bilong en, 'Hau bai wan wan man i ken yusim smol-skel egrikalsa long stretim sindaun bilong ol yet na ol komyuniti bilong ol'.

Jeffrey i bin kisim prais bilong en las wik, insait long wanpela seremoni long St. Joseph Intenesenel Katolik Koles long Pot Mosbi we Deputi Australia Hai Komisina Bronte Moules i bin stap long givim.

Esei bilong Jeffrey i toktok long wei bilong ol kaikai bilong asples i save strongim lokal ikonomi long taim ol i save banisim ol liklik fam, lokal wok na lokal stua na ol i save kamapim moa sekyuriti long kaikai.

Jeffrey i raitim: "Sapos ol i salim samting stret ii go long ol lain bilong kaikai, em ol smol-skel produsa baikisim gut veliu bilong ol prodak bilong ol mekim propit we inap long stretim laip bilong ol."

Joachkem Asinimbu bi-



L-R Deputi Australia Hai Komisina, Bronte Moules wantaim ol lain i winim prais, Sarea Epavea, Aashritha Arun, Joachkem Asinimbu, Jeffrey Odongo na ACIAR Kantri Menesa, Emily Flow-ers.



Jeffrey Odongo i bin winim namba wan prais na i kisim long han bilong Deputi Australia Hai Komisina Bronte Moules long St. Joseph Intenesenel Katolik Koles. Ol Foto: AHC

long De La Salle Sekendri na namba tri prais i go long Skul i kisim namba tu prais tupela sumatin, Aashritha

Arun bilong St Joseph Intenesenel Katolik Koles na Sarea Epavea bilong Mari-anville Sekendri Skul.

Moa long 150 sumatin i bin salim ol esei bilong ol i kam long ol skul insait long NCD na ol jas husat i kam long Australia Hai Komisen na Australia Senta bilong Intenesenel Egrikalsa Risets (ACIAR) i bin jajim ol entri.

Dispela esei kompetisen em ACIAR i bin sponsaim olsem wanpela hap bilong enuel PNG-Australia Bung Wantaim-Yumi Poroman lain iven we Australia Hai Komisen i bin go pas long kamapim wok bung namel long Papua Niugini na Australia insait long ol wei bilong musik, spots entetenmen na edukesen.

Kalenda bilong UPNG i senis

Charlpetson Koi i raitim

YUNIVESITI bilong Papua Niugini (UPNG) stretim gen akademik kalenda bilong en putim ol senis i kamap long ol taim tebol bilong ol klas na ol det bilong eksemnesen.

"Dispela disisen i stap long han bilong ol sumatin husat i laik pinisim Semesta 1 stadi bilong ol long 206 na bihain skul go het inap Semesta 2 akademik program long 2016 na stat bilong 2017, long kamap long taim bilong statim skul long ol skul opis bilong ol," UPNG Ekting Sensela, Dokta Mann i tok.

Dokta Mann i tok, "Disisen bilong kaunsil i min olsem 2017 akademik kalenda bai i gat tupela na hap Semesta na bai i larim skul i stat nomal gen long 2018. Sapos mipela i no mekim dispela i min olsem bai em i kisim olsem 3 o 4-pela yia long go bek long

nomal stail bilong skul," Dokta Mann i tok.

Dokta Mann i tokaut long dispela nius konpres long ol de bilong go bek long klas long Waigani na Taurama kempas.

"Ol sumatin i mas kam long skul na pulmapim fom bilong go bek long klas long Ogas 27 inap 31 long dispela yia. Long Fraide, Septemba 2 long 2016 bai i gat seremoni bilong wanbel na tok sori na klas bai stat long tupela kempas long Septemba 5," Dokta Mann i tok.

Dokta Mann i tok, "Mipela olgeta i lukluk long bungim ol sumatin na wanbel wantaim ol. Mipela i bilip olsem sapos mipela i wanbel na bung wantaim ol narapela lain tu bai mipela i lukim plantu bilong ol gupela sumatin bai bung wantaim mipela long stat gen long gupela envairomen na tingting long stadi bilong ol na ol akademik program."

UPNG i ken kisim fom bilong skul gen

Charlpetson Koi i raitim

VAIS Sensela bilong Yunivesiti bilong Papua Niugini, Profesa Albert Mellam, i tok olsem ol (UPNG Kaunsil) i tingting hat long mekim dispela disisen bilong ol sumatin long go bek long skul insait long Waigani na Taurama kempas.

"Mipela i mekim dispela disisen tasol em i wok bilong edministresen we em i kisim gupela tingting long luksave olsem ol sumatin i no inap lusim skul na long stretim ol dispela.

Bihain long kisim ol sumatin, bai mipela tingting long rum bilong ol,

kaikai bilong ol na ol narapela samting i bin bagarap long taim bilong protes na bai mipela traime long stretim," Profesa Mellam i tok.

Em i tok long kisim ol fom bilong statim skul gen bai ol sumatin i ken sekim long ol wan wan skul bilong ol insait long yunivesiti, o websait pes bilong ol o long ol Open Fleksibel Lening Senta.

Long wankain taim, Ekting Sensela, Dokta Nicholas Mann, i tok, "Mipela i laikim ol sumatin long tingting strong long ol stadi bilong ol na bihain ol i statim skul gen."

ACS luksave long ol pablik sevan



Daulo distrik edministresen wokman na meri, ol helt woka na polis i sanap wantaim ol ACS meri grup long taim bilong givim ol kaikai long Fonde wik i go pinis. *Poto: Loutova Siapea.*

Loutova Siapea i raitim

PLANTI ol memba bilong Seven De Edventis (SDA) sios na ol pipel long asples wantaim ol arapela jenerel pablik husat i bin kamap long Asaro distrik long Isten Hailans i bin kirap nogut long lukim planti ol SDA sios meri grup long distrik i bungim ol gaden kaikai na sampela ol stua kaikai tu na bringim i go long givim long ol pablik sevan bilong distrik edministresen, ol helt woka na polis long distrik.

Lida meri, Rachael Isaac wantaim Alice Gahare husat i bin i go pas long lidim grup i tok, Edventis Komyuniti Sevis (ACS) i bin kamap wantaim dispela tingting long luksave na givim ol kaikai i go long ol wokman na meri husat i save wok hat tru na givim sevis i go long ol pipel long distrik.

Tupela lidameri i tok, dispela em i namba wan taim long grup bilong tupela long divisen 3 long kamapim kain pasin bilong luksave na givim kaikai i go long ol wokman na meri na famili bilong ol.

Ol meri husat i bin bringim ol kaikai em ol hauslain long Daulo, Asaro veli, Asaro stesen, Wantrifu, Lulumbe, Anegu, Kwongi 1 na 2, Amayiufa, Kofena na Mando.

Distrik edministreta bilong Daulo distrik Ipae Seke i tok amamas olsem ol ASC meri i ken tingim na luksave long ol woka long distrik.

“Olsem man i bosim distrik, em i hat long toktok, bikos pasin em dispela ol meri i

mekim long luksave long ol woka long distrik. Papa God bai i ken blesim yupela long gutpela pasin bilong yupela,” Mista Seke i tok.

ASC grup i kamapim plen pinis long bung wantaim grup long divisen 4 we ol bai i go het wantaim dispela pasin bilong givim kaikai. Na narapela ples we ol i plen pinis long karim ol kaikai i go na givim long mun Oktoba dispela yia, em ol lain woda na famili bilong ol na ol kalabus lain long Bihute banis kalabus long Goroka.

SAVE na MEKIM

Kaukau

Tok bilong tul bilong wokim maunten long gaden kaukau

Tupela tul i stap bilong helpim yu gut tru long wokim maunten long gaden kaukau.

Tok bilong lip kaukau

Lip kaukau em i gutpela long man i kukim kru bilong em na kaikai. Na em i gutpela bilong givim long pik na pato na kakaruk tu.

Sapos yu gat gaden kaukau klostu long banis pik, na lip bilong kaukau i kamap planti na yu laik rausim hap lip, orait long olgeta moning, rausim liklik na givim long pik.

Sapos i no gat pik, orait em tu yu mas rausim sampela lip na sampela tasol i stap. Nogut planti lip tumas i karamapim olgeta graun na bai kaikai i no kamap gut.

Tok bilong dikim kaukau

Taim kaikai i redi pinis, yu ken dikim ol bikpela bikpela tasol long stik na lusim ol rop i stap bilong karim gen. Narapela rot em i olsem: Dikim long fok na kamautim olgeta kaikai na rop bilong em wantaim na plantim narapela kain kaikai olsem pinat. As bilong dispela namba tu rot i olsem: Kaukau bai i no pasim ples longpela taim. Na tu, dikim long fok em i isi.

Tok bilong binatang na sik

I gat sampela liklik binatang i save bagarapim kaukau. I gat sampela sik tu i save painim kaukau. Sapos i gat hevi olsem long gaden bilong yu, orait, toktok wantaim didiman bilong yu.

Tok bilong fetilaisa o marasin bilong helpim graun

I gat sampela kain marasin bilong helpim wok gaden, long tok Inglis ol i kolim Naitrosin (sotpela nem em i olsem: N). Narapela ol i kolim Potasium (sotpela nem: K). Was gut long yu no putim planti marasin tumas .

TUL BILONG WOKIM MAUTEN LONG GADEN KAUKAU

Savol bilong tupela man

Dispela savol em i gutpela bilong wokim maunten long gaden kaukau. Na tu, em i gutpela bilong wokim maunten arere long gaden rais i gat wara. Planti man ol i wok long dispela kain savol long hap bilong Arabia na long sampela hap bilong Rasia na Saina. Wanpela man i holim stik bilong savol na subim savol i go insait long graun, na em i givim stia tu long save i wokabout stret. Narapela man i pulim long rop. Tupela i mekim olsem na savolim graun i kamaut long baret na slipim antap long maunten. Sapos tupela man i poroman gut, bai wok i ran hariap.



Lidameri bilong Saina i traime m16 gun



Loutova Isapea i raitim

CHEN Xiaochuan em i no meri nating, long wanem, em i olsem wanpela politisen bikos em i go pas long lukautim moa long 103 milien pipel long ples bilong em.

Chen Xiaochuan, Vais Siameri bilong ol Ppels Kongres ov Guangdong Provins long Saina (China) Chen Xiaochuan i traime

skelim dispela polis gan M16 raifel long taim em wantaim ol wanwok bilong em i bin kam lukluk raun long Goroka Provinsal Haus sik na toktok long kamapim gutpela wok patnasip wantaim bod na menesmen bilong Isten Hailans Provinsal Helt Atoriti long Fonde wik i go pinis.

Poto: Loutova Isapea.

Gavana Jeneral i opim Yunaitet Sios Lidasip Samit



Ombusman Komisin i mas wok wantaim ol pipel long distrik

Long las wik yumi lukim Ekting Ombusman Komisina OC Mis Sangetari i pinis na gavman i makim Michael Dick olsem nupela Sif OC long lidim wok olsem was dok long kantri i ran olsem wanem.

Pastaim ekting OC Mis Sangetari, mi salu-tim yu long gutpela wok yu bin mekim na tu dispela wok, yu namba wan meri long makim ol meri long kantri long kamap kain lida olsem long wok OC long kantri. Tenkyu na wel done, Sangetari.

Bipo mi skruim tok, mi kisim yupela i go bek long het tok mi putim pinis long antap. Yumi wok long harim praim minista i autim tok long ol wok senis i kamap long kantri . Olgeta de long nius na long maus gavman i wok long paitim bros long ol bikpela wok em i mekim long senisim kantri bilong yumi.

Dispela wok senisim em long Mosbi sisit, tasol olsem wanem long ol distrik. Inap Praim Minista Peter O'Neill, Fainens minista, Minista bilong Nesenel Planing na ol NEC long go na sekim olgeta distrik long kantri senis o nogat. Sapos nogat, ol i mas sekim olgeta memba bilong wanwan ilektret K10 milien long wan wan yia i go olsem wanem na sekim distrik na lokal level gavman sevis atoriti, ol i wok bung wantaim memba bilong ol o nogat. Bikpela wok em ol mas salim odit tim long oditim olgeta mani memba i yusim olsem wanem.

Wanpela gutpela eksampel em memba bilong Middle Ramu Hon. Tommy Tomscoll. Inap dispela nupela tim bilong OC mekim wanpela wok painimaut long Middle Ramu Distrik, hau memba i save yusim K10 milian long wan wan yia.

Watpo na em i save i stap long Mosbi tasol nae m i no save go long ples. Watpo em i save ran i go i kam long Australia olsem teksi na Mosbi olsem distrik hetkwata bilong em na i no save soim pes long ples liklik.

Tru tumas, yumi pipel bilong Middle Ramu i kamap long long pinis na yumi i no opim maus na tok kros pait long mani bilong yumi hau memba i spendim na em i save givim mani ripot olsem wanem. Em i wanpela kliia piksa mi bringim i kamaut na mi bilip olgeta distrik i kamap wankain.

Olsem na sapos yumi glasim gut i gat bikpela pasin stil i wok long kamap nau long ol memba na i gutpela wok bilong Ombudsman Komisin i mas i go stret long distrik level na wok wantaim ol pipel long painimaut wan wan open memba i save spendim K10milian olsem wanem.

Tru, ol bai painimaut olsem ol i giman pepa wok tasol i stap hia long Mosbi na olgeta mani i go pinis long maus bilong ol memba.

Dispela em wanpela bikpela salens bilong OC na long dispela liklik taim yumi singautim OC long lusim Pot Mosbi na kam na mekim wok stret wantaim ol pipel long ples na lukim hau yumi suffa long ol gavman sevis.

Tok tru na trupela kala wok bai yumi win long 2017.

LONG Sarere 13 Ogas, 2016 Gavana Jeneral bilong Papua Niugini, Gren Sif Sir Michael Ogio, i bin kamap ges spika long opim wanpela Sios Lidasip Samit o kibung bilong Yunaitet Sios long PNG (UCPNG) long Elevala Yunaitet Sios, Hanuabada.

Dispela em i namba wan taim tru long UCPNG i holim dispela kain kibung na Sir Michael i bin amamas long stap stap long opim na tu long givim ol setifiket bihain long kibung.

Sios Lida Samit bilong Yunaitet Sios bilong PNG.

Bikpela tingting bilong Sios Lida Samit em, "Wokboi Lidasip na Gutpela Gavanens" we i kam long tingting bilong buk bilong propet Aisaia 42:1. We i rit olsem, "Dispela em i wokman bilong mi. Oltaim mi save strongim em. Mi yet mi bin makim em, na oltaim mi amamas moa yet long em. Mi putim pinis spirit bilong mi long em, na em bai i bringim stretpela pasin tasol long olgeta lain manmeri bilong graun."

Gren Sif, Sir Michael i tok, Bikpela Jisas Krai em i gutpela eksampel tru bilong gutpela lidasip. Insait long Gutnius bilong Mak, yumi lukim laip bilong Jisas Krai na pasin bilong em taim em. Baibel i tokim yumi olsem em i man bilong laikim ol narapela, stretpela pasin na em i gutpela, em i gat daun pasin, em i save oraitim sik na em i strongpela tru olsem pikinini bilong God, em i save kolim em yet olsem em i wokman bilong God.

"Jisas Krai wantaim olgeta pawa na atoriti em i gat, inap long bosim olgeta pipel bilong graun na daunim ol birua bilong em isi tru. Tasol nogat. Jisas Krai i daunim em yet na givim em yet long laik bilong God i go inap long pinis bilong laip bilong em olsem sakrifais bilong ol sin bilong yumi, long



Gavana Jeneral Gren Sif Sir Michael Ogio i toktok long taim bilong opim Namba wan Sios Lida Samit bilong Yunaitet Sios long PNG.



Gavana Jeneral Gren Sif Sir Michael i givim aut setifiket long ol sios lida husat i bin stap long lidasip samti long las wik Sarere.



Asbisop bilong Pot Mosbi Katoli Asdaiosis, Reveren John Ribat i toktok long taim bilong lida samit. Poto na stori i kam long Gavman Haus Midia

yumi i ken gat hop long kisim laip i stap oltaim oltaim.

"Buk Baibel bilong Gutpela Sindaun i tok kliia long lidasip kwaliti bilong gutpela lida. Gutpela lida i save wok hat, i save harim gut toktok pastaim na bihain em i

bekim tok, em i save gat gutpela nupela aidia, i save sanap strong taim hevi i kam na em i no save laik kisim biknem long em yet.

Yumi olsem ol lida bilong sios, i mas soim laip bilong yumi olsem gutpela lida na i no long

maus tasol. Lida i mas strong long ol disisen bilong em na i no ken senisim tingting taim traim i kam, na em i mas inap long sanap long stretim ol rong bilong em. Na moa long dispela, trupela lida em i wanpela man husat i

save tok tenkyu na amams long ol lain em i save lidim na em i save lusim rong bilong olgeta lain," Sir Michael i tok.

Insait long dispela samit ol lida i kisim nupela save na we bilong gutpela wokman lidasip stail long stretim ol wok bilong ol seket na kongrigesen bilong ol.

"Olsem ol lida bilong sios, em i bikpela samting long yupela i gat ol gutpela samting long helpim yupela long luk-save long ol salens na mekim wok long stretim ol. Baibel em i namba wan na bikpela tul long yu gat long lukim rot long kain taim bilong hevi olsem. Baibel i gat ol toktok bilong gutpela tingting na save na tu em i gat ol rot bilong stretim ol hevi bilong ol pipel tude.

"Em i tru olsem Gutpela lidasip em i as bilong strongpela gavanens we i go het. Wok bung wantaim em i no isi long mekim na em i ken luk olsem i hat tumas. Em bai nidim komitmen na dedikesen. Tasol, wok bung wantaim patnasip yumi ken kisim planti gutpela samting. Yumi ken strongim ol kongrigesen na rausim ol pasin nogut olsem korapsen long olgeta hap". Em i tok.

Gren Sif Sir Michael i tok moa olsem gutpela lidasip i stat wantaim wan wan man na meri.

"Taim yumi senisim pasin bilong yumi, yumi ken senisim laip bilong ol narapela insait long haus, komyuniti, sios na nesen.

"Prea em i wanpela strongpela tul na em i stap bilong yumi olgeta wan wan long yusim na i no gat mani long baim. Wantaim prea, yumi ken kisim tok stia na sapot long helpim ol kongrigesen bilong yumi na komyuniti na kantri olgeta.

Wantaim dispela mi amamas long opim dispela Namba wan Yunaitet Sios Lida Samit insait long Papua Niugini!" Gren Sif, Sir Michael i tok.

I mas gat pablik tok save long nupela lo bilong gavman

PALAMEN I tok orait long wanpela nupela lo bilong stopim ol lain i yusim komputa na mobail fon long bagarapim ol narapela manmeri o long stilim na bagarapim wok bilong gavman na ol bikpela kampani na o manmeri nating tu.

Dispela nupela lo bilong pait egensim cyber crime em i no nupela samting. Planti kantri long wol i gat kain lo olsem bikos ol lain nogut i wok long yusim moden teknoloji olsem ol komputa na mobail fon long kamapim kain kain trabel.

I mas i gat lo i stap long stopim ol man nogut i kamapim trabel long dispela rot. Sapos i no gat lo bai i hatwok tru long kotim ol.

Ating long taim ol pipel i harim dispela tok save long dispela nupela lo bai planti bilong ol i amamas. Long PNG i gat ol lain i kamap long kot bikos ol i salim tok nogut long mobail fon bilong ol i go long ol narapela lain.

I gat ol kon lain i yusim mobail na kompiuta long traime stilim mani long ol arapela manmeri. Ol bisnis olsem ol benk i wok long lukim ol kon lain i giamanim ol kastoma long kisim dinau mani.

Tude yumi harim nius bilong ol gavman bilong ol bikpela kantri long wol i wok long wari bikos sampela lain i wok long go insait long ol kompiuta bilong ol na stilim ol hait samting bilong gavman. Sekyuriti bilong ol kantri i



Jada 016!

ken bagarap sapos kain pasin olsem i kamap. PNG tu i ken luk-save long dispela na redi tasol long abrusim ol kain hevi olsem i kamap long kantri bilong yumi.

I gutpela olsem Palamen i tok orait long dispela nupela lo.

Ol manmeri na ol pikinini tu husat i wok long yusim mobail fon

o kompiuta long bagarapim ol narapela manmeri bai i save nau olsem i gat strongpela lo i stap nau long givim strongpela mekim save long ol. Ol lain i brukim dispela lo i ken baim kot inap long mani mak bilong K1milien.

Dispela em i bikpela mani tumas ol manmeri nating bilong

PNG i no inap lukim long laip bilong ol.

Nesenel gavman i mekim bikpela wok long paitim toktok wantaim ol gavman dipatmen ol IT saveman na ol ovasis saveman na meri tu bipo long em i kamapim dispela nupela lo.

Ol i mekim bikpela wok na nau

bai dispela lo i mekim wok bilong lukautim gut laip bilong pipel na kantri.

Tasol i gat sampela askim i stap. Bai gavman i yusim dispela lo long stretpela rot o olsem wanem? Bai ol i yusim long mekim save long ol lain husat i save yusim internet long raitim ol strongpela toktok egensim gavman na ol narapela o nogat?

I gat planti ol toktok i save kamap long sosel media, sampela i tru, planti i tok win tasol.

Ol pipel i fri long autim tingting bilong ol i go i kam namel long ol pren bilong ol. Bai dispela nupela lo i stopim ol o nogat?

Ol pipel i gat planti askim long dispela nupela lo.

Olsem na ating i gutpela long putim ples klia na ol pipel i ken ritim na klia na save long wanem kain penalti ol i ken kisim long taim ol i brukim seksen bilong dispela nupela lo.

Ol nius ripota i mas klia long dispela lo na olsem wanem em i ken salensim wok bilong ol. Ol lain i yusim sosel media bai i tingting planti nau bikos i gat lo i stap long kotim ol sapos ol i brukim sampela seksen bilong en.

Ol lo i kamap long lukautim gut sindaun bilong ol pipel na mekim kantri i seif long ol lain husat i laik bagarapim gavman na ol pipel. Orait i mas gat pablik tok save long ol pipel long dispela nupela lo.

Wei bilong kamap gutpela lida

OLGETA manmeri, maski ol i stap laip o i pinis, ol i laik stap amamas.

Kain pilim i nogat tok long em long wanem em pilim olgeta manmeri i gat long em.

Tasol sapos wanpela i amamas o nogat, em i soim wei wanpela i stap long em.

Long nau SkelimTingting i laik toktok long ol rot lidaman i ken save na yusim long bringim amamas long grup em i go pas long en na long gutpela bilong em yet.

Sampela manmeri em mama i karim ol olsem, ol i isi long kamap lida tasol planti nogat. Ol i mas lain long kamap lida.

Sapos wanpela i lida bilong tausen manmeri, wan handret, 10-pela o wanpela man, i gutpela em i save long sampela wei long lukautim grup bilong en.



Yunivesiti bilong Notre Dame long Amerika i tokaut long sampela wei lida i ken yusim long wok bilong en. Dispela ol wei em:

- Skelim wanpela yet – ol gutpela lidamanmeri long wan wan taim i save kisim taim na skelim strong na save ol i gat long wok (o pilai) ol i mekim. Ol i askim, “Mi save laik long mekim wanem samting? Mi gutpela long wanem samting?” Long save long ol hap we wanpela

i no gutpela long em, dispela i no ken soim wanpela em i no inap o fit long mekim wok, tasol i soim em i ken larim narapela memba husat i gutpela long dispela wok i mekim. Dispela long lukim grup i pinisim gut wok ol i mas mekim long em. Moa yet manmeri i lainim wei long kamap gutpela lida tu.

- Tingting i op – lida mas gat gutpela komyunikesen namel long ol memba bilong en. Sapos em i laik save gut long wei em i mekim wok em i ken askim ol memba bilong en. Taim wanpela i mekim olsem em inap long kisim ol tok olsem, “Yu no save givim taim long harim mipela o soim amamas long wok mipela i mekim”. Lida i ken save tu long tingting ol memba i gat long em long taim em i go o

stap namel long grup. Ol i pasim maus hariap na stap isi taim em i stap o nogat. Gutpela lida i lida ol memba i save laik long toktok gut wantaim.

- Gat save long stap bilong oganaisesen – Gutpela lida i save long as tingting bilong kamap na stap bilong oganaisesen bilong en. Lida i save tu long wei ol memba i wok long go bungim as tingting bilong oganaisesen. Kain save i helpim lida long wok gut long lukim oganaisesen bilong en i stap gut.

- Go pas long mekim wok – lida i save go pas long mekim wok, maski wok i hat o isi.

Em ol sampela wei bilong save na kamap gutpela lida na long lukim grup bilong en i stap gut.



Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500
Fax: (675) 325 2579

Email: editorial@wantokniuspepa.com

Pe bilong wanpela yia
52 niuspepa

| Ples: | Air: |
|-----------------------|------------|
| PNG | K220.00 |
| AUSTRALIA | US\$110.00 |
| ASIA PACIFIC na JAPAN | US\$150.00 |
| AMERICA na EUROPE | US\$210.00 |

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Enga kalsarel So kam gut



1

1 Singing grup bilong ol meri long Pilikambi long Laiagam.

2 Gavana bilong Enga Provins, Peter Ipatas, Provin-sal Polis Komanda, George Kakas, i sanap long stej bihain long Ipatas i welkamim ol pipel.

3 Mista Disck Lang, Tua Opereta na man husat i bin opim so, i givim K2,000 i go long siameri bilong Enga Kalsarel So, Margaret Potane, na long namel em i pikinini meri bilong em.

NAMBA 22 Kalsarel So long Wabag, Enga, i kamap long Ogas 6 i go inap long Ogas 8 i kamap orait tru. Planti lain i pulap long taim bilong so, tasol i no gat wanpela birua pasin i bin kamap.

Astingting bilong dispela so i ridim olsem "Tredisinal Kalsa bilong mipela em i Praid bilong mipela na Aidentiti bilong mipela".

Ol lain i bin bilas long kaikain stail bilong ol na i kam bung long Mommers soka pilai graun long Wabag. Moa long 30, 000 manmeri i bin go insait long geit insait long tripela de bilong so.

Long taim bilong opim so, Gavana bilong Enga, Peter Ipatas, i welkamim ol lain husat i kam long lukim so na ol lain i bin bilas long taim bilong so.

Long wankain taim, Dick Lang, wanpela bilong Australia husat i save sapotim ol kalsarel so, i bin kam long kantri long praivet jet bilong em na bikpela namba bilong turis tu i kam wantaim em. Ol i bin givim taim long em long opim so.

Lang i opim Kalsarel So na i tok olsem, em i bin go raun moa long 40 kantri pinis long wol long lukim ol kalsarel iven, na tu em i save kam go long Lae, Goroka na Maunten Hagen, tasol em i tok dispela so em i kamap namba wan tru.

Astingting bilong so i bin senis pinis long tupela yia i go na dispela i larim ol tredisinel grup long Enga tasol i kam na soim ol kalsa na stail bilong ol.

Long dispela grup, ol i bin tok orait long Hela Provins tasol long putim tredisinel bilas bilong ol na i kam bikos Enga na Hela i bin kamap long wanpela tumbuna.

Ol i bin senisim astingting bilong so i stopim ol narapela provins long bilas wantaim na Enga Provinsal Gavman na So Sosaiti i strongim ol Enga long sevim kalsa bilong ol.

Taim Gavana Ipatas i bin toktok long taim ol i opim so, em i tokim ol pipel bilong Enga olsem, "yupela mas no ken lus tingting long tokples, kalsa na tredisinel velyu bilong yupela bikos em ol aidenteti bilong mipela."

Ol i tok orait long olgeta Praimeri, Sekenderi na Teseri skul insait long Enga long soim kala na stail bilong ol tu long so bikos dispela em i rot bilong holim tredisen na kalsa insait long ol yangpela pipel na ol jeneresen bai kamap bihain.

Insait long so graun, ol singa olsem Sharzy, Kdumen, Daniel Bilip Leonard Kania na ol narapela asples singa long Enga tu i bin pilai laip gita. Dispela i pulim planti ol yangpela pipel long bung.

Long taim bilong so, ol i salim 200 polis pesenel insait long tripela de iven i kamap bilong strongim pis.

I no gat wanpela bikpela birua pasin i bin kamap, tasol planti ol liklik pikinini na yanpela pipel i dring bia na smukim spak brus na i kam insait long so graun. "Mi bin lukim olsem ol dispela yanpela lain i bin go insait long so graun long lukim ol singa i bin pilaim laip gita na ol i amamasim ol yet taim ol i dring na smukim drag.

Ol polis i holimpasim moa long 100 man husat i drink na pulim drak insait long so graun na lokim ol long sel. Bikpela namba bilong ol lain husat ol polis i holipasim ol em ol i hai skul na teseri skul sumatin.

Ol i bin stopim bia insait long tripela de, tasol planti pipel i bin dring hom bru we ol i save salim long ol hait hap insait long Wabag taun.

Ol polis i bin painim aut planti bilong ol dispela hom bru fektori bipo long so i kamap, tasol sampela i hait yet stap na spakim ol yangpela populesen.

Tasol, i no gat wanpela bikpela birua pasin i kamap, nogat.

Provinsal Polis Komanda, George Kakas, i toktok strong long Enga So Sosaiti long stopim ol laip gita long pilai long Enga Kalsarel So bai kamap bihain bikos dispela daunim astingting bilong dispela so i kamap.

"Dispela so em i bilong skulim ol yanpela pipel long holim yet kalsa bilong mipela, tasol planti yanpela pipel i bung long hap ol i bin pilai laip gita na i redi long drink na smukim drag long amamasim ol yet," Kakas i tok.



2



3

Ol Tsak Veli singsing grup i toktok wantaim wanpela turis.



Live the Dream

Ol studen i givim kala long laip stori bilong Don Bosco

DON Bosco Teknikel Skul long Gabutu, NCD i bin putim wanpela naispela musik drama ol i kolim Live the Dream long Mande Ogas 15. Planti manmeri, ol papamama i bin pulapim Kurongku Hall bilong skul long lukim dispela pilai.

Dispela musik drama em ol i kisim long Spenis presentesen bilong Don bosco, a cantata em Fr Belarmino Sanchez sdb i bin raitim. Fr Ian Douulton sdb long Mumbai i bin tanim i go long Inglis na hia long PNG, Fr Angel Sanchez sdb wantaim Mis Rica Lavilla i bin kamapim.

I bin gat 320 memba i stap insait long dispela musik drama.

LIVE the Dream, em i stori long impoten laip bilong Don Bosco, taim em i yangpela driman na bilip bilong em na pasin bilong em long stap amamas. Em i stori bilong St John Bosco long taim em i gat nainpela kris-mas. Long driman bilong em, liklik Jonny i wok long pait wantaim bikpela lain yangpela man husat i wok long bikmaus na pait. Em i traिम stopim ol tasol ol i no harim tok bilong em. Wantu, wanpela man i kamap na i tok, "Yu tromoi han bai yu no inap helpim ol dispela yangpela, yu mekim gut na soim gut-pela pasin!"

Long laip stori bilong em, Memoirs of the



Ol Salesien pater i sanap long sait na ol sumatin man na meri i bilas long tumbuna klos na wokim wanpela tumbuna singsing gen.

Oratory, Don Bosco i tok, dispela namba wan driman bilong em i impoten. Dispela driman i senisim laip bilong em.

Dispela musik drama bilong ol studen i bin kamap gut tru wantaim ol instramen na bekap kwaia bilong musik grup bilong skul. Christopher Naukue bilong Gret 9 Besucco klas i ekt olsem liklik Johnny na Howard

Unna bilong Gr 11 Srug i bin ekt olsem Don Bosco. Misis Abono Miwasa wanpela wokmeri bilong skul i bin ekt olsem Mama Margaret. Long taim em i singim dispela song, "Now you are a priest forever" aiwara i pulap long ai bilong ol lain i harim.

Ol lain bilong olgeta dipatmen na ol tisa na ol arapela wok lain bilong skul i bin givim gut-

pela kala tru long dispela drama. Ol toktok na piksa bilong ol papamama tude i karim dispela stori bilong Don Bosco i go long lewa bilong ol lain husat i sindaun lukluk i stap.

"Dispela musik drama i kirapim tingting bilong ol yangpela long kamapim gutpela senis long taim ol i ekt olsem ol lain insait long driman bilong Don Bosco," Fr Ambrose Perreira sdb kodineta bilong dispela prodak-sen i tok.

Olgeta hap bilong dispela drama i gat salens bilong en yet na i mekim ol lain i sindaun lukluk long skelim ol hevi ol yangpela bilong tude i save bungim. Em i mekim ol yut long lusim pasin bilong toktok long ol hevi, na long bihainim eksampel bilong dispela was-Santu bilong ol Yut.

Live the Dream em i no bilong lukim na harim musik tasol, nogat. Em i kirapim tingting bilong ol manmeri long ol kain kain wok ol i ken mekim tude long winim driman bilong Don Boscco long taim em i bin gat nainpela krismas.

Wanpela dairekta Mis Rica Lavilla i amamas tru na i tok tenkyu long olgeta memba bilong kast na ol kru long bikpela hatwok ol i mekim long prektis inap planti wik long redi gut.

Planti lain husat i lukim dispela musik drama i bin amamas tru na ol i mekim planti gutpela toktok.



Wanpela sumatin i makim Santu Don Bosco olsem em i bin kamap pater long taim bilong em i statim wok bilong helpim ol yangpela boi.



Ol mama na papa wantaim ol famili na pren i kamap long lukim ol sumatin i putim ol kain kain pilai, singsing na danis long stori bilong Faunda bilong Don Bosco Skul, Santu Don Bosco yet.



Ol sumatin i redi long soim laspela stail pilai danis bilong ol long Don Bosco Teknikel Skul hall long Gabutu.

Toro



Biabia



Kanage



Autim Tingting

Mi wanpela viles kot opisol na mi gat wanpela askim o wari. Em I olsem, Deputi Praim minista Leo Dion, em I tok olgeta viles kot opisa ken stap long pe rol. Tasol PNG 7-pela opisa no nap, deputi Praim minista em giaman o gav-man?
Tenkyu.

Michael Kunjil
WHP - Baeya Distrik

Toksave i go aut long pablik olsem Wantok Niuspepa bai ranim gen "Autim Tingting" we ol Wantok rida na pablik i ken salim teks mesej i kam long ol tingting, wari na toktok yupela i gat long ol samting i kamap long komyuniti, provins na kantri, ol samting i karamapim sait bilong sosel, politiks, ikonmik, sios, helt, edukesen na ol bikipela samting i kamap long kantri. No ken salim teks i bagarapim ol sios, narapela manmeri, painim meri o penpren bikos Wantok bai no inap putim ol dispela long pepa. Sapos yu laik painim famili memba, hauslain na wanpisin i lus na yu no save em i stap we, yu ken salim teks i kam. Edita bai gat fainol toktok long ol atikel bai kamap long pepa.

Telepon namba yu ken salim teks mesej i kam em:


71845906

Tenkyu tru
Edita-Wantok Niuspepa



Don Bosco Teknikal Skul long Gabutu i holim 31 yia bilong faundesen selebresen wantaim stail. Hia ol sumatin i wokim danis bilong Don Bosco, Faunda olsem i stap long lewa tru bilong ol na tu long ol i tokaut olsem ol bai kamapim tru driman we Santu Don Bosco i bin gat long ol yangpela boi long wol. Foto: Fr. Ambrose Pereira sdb.

Em nau! Ol pikinini i ken painim rot i go long ples wantaim Wantok lain...



R S V G R N T E L R S E F N R P A T R
 K E P E R I N I N I N A G
 F L M E N S I A L E N G E R K R R
 N B A O U P N L A V I P A A I F Z R X

PAINIM WOD PILAI

- Ol wod lista:**
- | | | |
|----------------|----------------|-----------------|
| FUL | KROBA | OFERIM |
| GRAUN | LANGUR | PAINIM |
| AMERIKA | LITIMAP | PENSIL |
| BAIM | LONGSIA | RIPOT |
| BIKMAUS | MALAS | SAITIM |
| BRUMIM | MUMUT | SIMBUM |
| DRIP | NATING | TINGTING |

O N E A I A P I E T E C G S C A V N H C W N R C R
 T N I R B G L A J M N J S Q S J X S F Q X K A I B
 Q G H J E W K F D L U R A A B O B I V T I T B K M
 P D F E I G R A U N N E J R P V N W M G H A I F S
 S O E X D E S Y R L I R N E A S I M B U M T S M A
 L I O T T F C S N D P A P T I C I N C A M T I L G
 I N L M N T N H T E B T E B N T P S P L A U E A E
 F U D E E D S E V O O O F S I O U M I I I E T T I
 I S L M I V D A A P M P B A M A D S B X R R I A S
 R K O I B N C U I I D V S S M C N T M I Q E B T D
 S K N O C N P R Q E Q R S K T E E I E C I O L A J
 D B G T A P E N O B O I I X P G R B O I R P M P P
 S G S K I E I E O A E B N P H E P I T K I R A P T
 N I I A Q L J Y F N E R A V F Q R E K N P I L L N
 E O A B V H J T N G O U T O A M D D I A S S A A G
 R H B D J W N X M L O M I Y B N U F M G U E S N E
 G L S A S L A E R X P I N S A I T I N G T I N G L
 E S O K C X S B O F S M G H I N T I S O H D Q U S
 D C E H A P F A U L D N I I M I L L T H A S F R A
 T L Y S I H R G S P F O K A L A P A E J W S O G R

STORI BILONG TUMBUNA

Watpo yumi mas dai

Bipo tru tupela manmeri i bin i stap long wanpela viles ol i kolim Wamo, insait long Nipa. Nem bilong man em i Pelum, na nem bilong meri Ralnu. Ralnu em i gat bel, na wanpela de Pelum em i kirap na i go long wanpela liklik bus na em i laik wokim haus karim.

Wokim liklik haus pinis, Pelum i tokim meri bilong em Ralnu i spik; "Mi wokim haus pinis, na yu mas slip long dispela liklik haus na karim pikinini. Sapos yu karim pikinini man, orait yu no givim susu yet, yu mas kam na tokim mi.

Sapos yu karim pikinini meri, orait yu mas holim i stap long dispela haus i go inap long wanpela mun olgeta. Pinis, orait yu mas kam bek long Wamo viles." Na long apinun, samting olsem 5 klok, Ralnu i bin karim nupela pikinini man.

Meri em i ting long wokabaut i go na tokim man bilong em. Long wanem, Pelum i bin tokaut pastaim long kam na tokim mi sapos yu karim pikinini man. Olsem na em i stat long wokabaut i go long rot. Tasol dispela Ralnu i no givim susu long pikinini yet, na em i no karim pikinini long bilum tu, nogat! Em i bin holim pikinini long han tasol, na em i bin wokabaut i go. Tupela wokabaut i go na em i laik i go daun long wanpela ples i daun liklik. Meri i no bin lukim wanpela bikpela tambaran Yekilman i bin kam sanap pinis long pes bilong em. Meri i lukim em, na em i seksek nogut tru.

Bikos bipo em i no bin lukim dispela kain man i bikpela man tru. Dispela Yekilman i tokim em, "Meri, mi laik givim yu dispela yelopela prut bilong tumbuna em pamken. Yu mas givim long pikinini bilong yu olsem susu. Na yu no ken givim susu bilong yu long pikinini bilong yu." Na nara-pela skin bilong diwai, em i givim dispela na meri na tok, "Yu mas slipim pikinini long dispela skin

diwai. Yu no ken karim pikinini long bilum, nating, nogat. Yu mas karim pikinini long dispela skin diwai tasol." Tasol meri i no laik kisim tupela samting. Meri i tok, "Bilong wanem mi kisim dispela tupela samting? Maski. Mi gat susu bilong mi yet, na mi gat bilum na karuka mat bilong mi yet. Bai mi inap givim susu bilong mi yet long pikinini bilong mi, na bai mi slipim pikinini long mat bilong mi yet." Yekilman i bekim tok, "Meri! Yu sakim tok bilong mi, orait yu harim. Mi bikepal man bilong maunten Yalam, na mi save lukautim bus na gaden, na olgeta manmeri bilong graun hia. Nogut yu bringim taim nogut long ol pipel bilong yu."

Meri i tok, "Olabei, bikpela man, wanem kain taim nogut? Long graun olgeta taim mipela i gat gutpela taim tasol, na mipela no save pilim belhevi wanpela taim. Nogat tru." Yekilman i tok, "orait yu meri yu sakim tok bilong mi, orait mi laik tokim yu wanpela tok bilong i stap oltaim, oltaim. Olgeta manmeri i kama long lain bilong yu, olgeta i mas i dai tasol. Tasol moa yet, ol i mas gro gen, na ol tu i mas dai gen.

Em bilong oltaim tru." Tasol sapos meri i no sakim bilong Yekilman, olgeta manmeri i wok long kamap gen. Na ol manmeri i lapun pinis ol inap tekewe skin, na i kamap yangpela manmeri gen. Na graun laip pulap tru long manmeri. Tasol meri yet i bringim taim nogut tru. Long wanem, meri yet i tok, mi inap givim susu. Olsem na yumi dring susu, em i samting nogut. Bikos em i olsem yum kaikai mama bilong yumi gen. Tasol bipo tru dispela yet i statim em, na yumi save dring susu bilong mama.

Dispela samting tasol i bringim as bilong indai. Sampela manmeri bilong Sauten Hailans bilong mipela i save ting olsem nau yet. Bikos yumi i no enimal na yumi save kaikai gris bilong mama gen, dispela em i as bilong indai.

Ansa bilong Wod Pilai isu 2187

Y U C I G W O E E E A W E N G Y C L I A A P F N
 M S R F D E A Z G D E O C F P U B S N S T S E I A
 G C E R X F E L H C O E T S E V K A F M T O G A I
 K C P J E M O Y B G H S E J E C M R L B R I A S G
 T F P R A I F M A G H O A F D U Q E F W R P N M G
 E C F S E M I J D M R G O N U O K R O E V O I U O
 E T H L R R T E J N O T R G R S X J T P S P N K N
 H F E P S T O I G H I D B I I L C A I N A O I M C
 W M S I I S T A G L D L Y L L W B M N K C L T U S
 F Q W R U E B R S T Z N P D M E L A O G D S M K N
 M A N O E L P H M E F V R I A I A L N R I V N A H
 H F A I I Q H N O P I N I S S X K A U O T K H E N
 D G A H N N E E E O S I O T I F B R F L G U A K Z
 N Q T T O T S S I S S V M R M O I O P U N I P I
 D B R S N I C H A R A S S O I A F T A O E E A S M W
 E V E N T I H E E E H E T K E L A A I L P I J J T
 Y S Z S I F O Y N M E K F I T Q A E V A R N M B W
 G E E O P M S N H P D A V A M S I O A E I F I D F
 I E W Y Y T P Q B A Z N E U E T R C G O G I T I
 F C S N L C O N F R S S D L N N R O J G S Z C L E



TOK PISIN NEWS

from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

| Tok Pisin Service | |
|-------------------|-----------------------------|
| 6am - 7am | 6080; 7240(KHZ) |
| 7pm - 9pm | 5995; 6020; 9710; 1280(KHZ) |

Lomai i no amamas long ol lain Manus i paitim ol refuji



Ol lain i wet long kisim kaikai long Manus Ailan ditensen senta.

Sam Seke i raitim

LOYA bilong ol asailam sika na refuji long Manus i toktok strong long sampela man i bin paitim nogut tupela refuji.

Ben Lomai i tok dispela kain pasin em i bagarapim gutpela nem bilong ol pipel bilong Manus, na tu nem bilong Papua Niugini.

Dairekta bilong Legal Edvokesi long Human

Raits Lo Senta long Australia, Daniel Webb, i bin autim dispela wari bihain long em i bin go long Manus long wik i go pinis.

Mista Lomai i tok em i laik gavman bilong Australia na PNG i hariap na autim ol asailam sika na refuji long Manus bihainim oda bilong PNG Suprim Kot long mun Epril.

Em i tok ol refuji i no laik stap long PNG na dispela kain pasin bai ken kamap moa sapos ol i no lusim Manus hariap.

Vanuatu na ol aid dona

Caroline Tiriman i raitim

PALAMENTERI Seketeri bilong Vanuatu, Johnny Koanapo i askim gavman long tok kliia gut long ol lain o dona husat i save helpim Vanuatu long ol kain sapot em gavman i laikim long ol dispela dona.

Johnny Koanapo i tok wanpela long ol dispela bikpela dona em Yunaitet Nesens (UN) husat i save helpim long ol kain wok bilong

mekim ol senis long wok politiks, na tu long bihainim gut ol Milenium Developmen Gol em ol i bin statim long 2000 na i bin pinis long 2015.

Sampela long ol dispela Gol em long pinisim hangre long wol, narapela em long olgeta pikinini i mas skul, narapela em long apim wok bilong lukautim helt bilong ol mama, na tu long pinisim wari bilong vailens egensim ol meri.

Fiji i winim gol medal long Rio Olimpik

Sam Seke i raitim

FIJI i mekim histori las wik long taim ragbi sevens tim bilong ol man i winim gol medal long Olimpik Gems long Rio.

Fiji husat i Wol Series Sempron tu long ragbiunion sevens, i bin winim Gret Briten 43 - 7 long fainel pilai na winim gol medal.

Dispela em i namba wan Olimpik medal bilong Fiji, na emi namba wan Olimpik gol medal tu bilong ol ailan kantri long Pasifik.

Long ol kantri long Pasifik, Tonga tasol i bin winim wanpela medal long Summer Olimpik, taim Supa Heviweit Boksa bilong ol, Paea Wolfgramm, i winim silva medal long 1996 long Atlanta, USA.

Papua Niugini i bin winim wanpela silva medal long 2008 Paralympics taim Francis Kompaon bilong Rabaul i winim namba wan Paralimpik Olimpik medal long 100 mita sprint. Oltaim, ol kantri long Pasi-



Fiji Ragbi Sevens i amamas long winim Olimpik gol medal.

fik ailan i save salim ol etlit i go long resis long ol Olimpik Gems tasol em i no isi long winim ol medal.

Osea Kolinisau na olgeta ragbi sevens tim memba i pinisim gut gem bilong ol insait long las tupela yia na nau ol i winim gut tru Gret Briten 43 - 7 long Rio.

Kolinisau em i skoaim namba wan trai long ol 7-pela trai bilong Fiji. Long hap taim, i luk olsem

Fiji bai win taim skoa i bin sanap 20 - 0.

Ragbi em i kam bek gen long Olimpik bihain long-wanpela 15-a-side tonamen long 1924 long Frans.

Intenesenel Olimpik Komiti i tok orait long 2009 long putim ragbi sevens long Rio.

Saut Afrika i winim brons medal taim ol i winim Japan 54-14 - na Gret Briten i kisim silva medal.

Juffa i wanbel long PNG i no laik joinim Pacer Plus

Caroline Tiriman i raitim

GAVANA bilong Oro provins Garry Juffa i tok em i sapotim tru tingting bilong gavman long lusim wokbung bilong tred wantaim, Australia, Nu Silan na ol Pasific Ailan kantri em ol i kolim Pacific Agreement on Closer Economic Relations PLUS (PACER PLUS).

Minista bilong Tred Komes na Indastri Richard Maru, i bin tokaut long dispela tingting bilong gavman tupela wik i go pinis.

Ol narapela Pasifik Ailan kantri bai bung na toktok wantaim Australia na Nu Silan long dispela tred wokbung long neks wik, tasol PNG bai no inap stap long



Sampela lain bilong Australia i protes long Melbourne egensim Pacer Plus tred agrimen.

dispela miting.

Sampela saveman long rijon olsem Gavana Juffa na John Salong, wanpela bisniman bilong Vanuatu i save

toktok strong egensim dispela wokbung long wanem ol i tok olsem bai em i no inap helpim tumas ol liklik kantri long rijon long wok bisnis.

Hela lida i laik gavman i stretim kwik trabel long LNG eria

Caroline Tiriman i raitim

WANPELA lida bilong Hela i tok hevi bilong ol Hela papagraun long LNG projek bai inap kamap olsem Bogenvil Kraisis.

Memba bilong Komo Magarima long Palaman, Francis Potape i tok lukaut olsem hevi wantaim ol papagraun long Hides Gas Plent long Hela provins bai inap kamapim wankain hevi olsem dispela hevi i bin kamap long Bogenvil sapos gavman i no stretim wari bilong ol papagraun.

Mista Potape i mekim dispela toktok bi-

hain long raun bilong wanpela tim bilong Gavman i go long Hela provins las wik we ol i bin traim toktok wantaim ol papagraun.

Ol pipel i bin pasim dispela gas projek em ExxonMobil i papa long en long wik i go pinis na ol i givim nesenel gavman wan wik long stretim planti wari bilong ol. Ol papagraun i tok ol i wok long karim ol dispela hevi inap long 6-pela yia nau.

Ol dispela pipel i sutim tok olsem gavman i no bin bihainim agrimen long baim ol moa long wan bilien kina winmani long PNG LNG projek.

Ol Hela papagraun i laik toktok long wari bilong ol nau

Caroline Tiriman i raitim

LIDA bilong Julia na Aya wanpisi long Hela provins i tokim gavman olsem ol i redi long rausim tambu em ol i bin putim long LNG Kondisenening bisnis long provins sapos gavman i bihainim askim bilong ol.

Andy Hamaga i mekim dispela toktok bihain long miting bilong ol papagraun wantaim ol senia gavman opisa. Ol i tokim tu ol dispela gavman opisa long rausim kot oda

long stopim wok bilong painim na luksave long olgeta memba bilong ol wan wan lain wanpisi.

Ol papagraun i bin pasim gas projek long wik i go pinis na ol i givim gavman inap long Fraide long stretim planti wari bilong ol em ol i tok i stap inap long 6-pela yia nau.

Ol dispela pipel i sutim tok long gavman i no bin bihainim agrimen long baim ol moa long wan bilien kina winmani long PNG LNG projek.

PNG na Fiji i gat hevi long tred

Caroline Tiriman i raitim

WANPELA Gavana bilong strongpela egrikalsa provins long Papua Niugini i tok em i sapotim tingting bilong Minista bilong Tred long no ken baim kakaruk i kam long Fiji bihain long ol hevi bilong tred i kamap namel long tupela kantri.

Gavana bilong Wes Nu Briten, Sasindran Muthuvel i mekim dispela toktok bi-

hain long ol strongpela toktok Minista bilong Tred, Komes na Indastri Richard Maru, i bin mekim egensim Fiji long wanem Fiji i no save larim PNG i salim ol samting olsem PNG bisket, kon bif na tin pis i go long Fiji.

Dispela hevi namel long-PNG na Fiji i stap inap planti yia nau na Mista Maru i tok, PNG i les pinis long dispela kain pasin bilong Fiji. Emi tok Fiji i save salim

planti samting tru i go long Papua Niugini we i winim mak bilong ol samting PNG i save salim i go long Fiji aninit long Melanesian Spiahead tred agrimen.

Minista Maru i tok tu olsem planti pipel bilong Fiji nau i save wok long PNG na pasin Fiji i mekim i no stret.

Gavana Muthuvel i tok em i wanbel long dispela strongpela toktok bilong Mista Maru.

Nupela Boko Haram video soim ol Chibok skul meri



Ol skul meri bilong Chibok ol lain Boko Haram i bin holim kalabusim.

BOKO Haram i soim wanpela nupela video bilong sampela bilong ol skul meri em ol i bin holim kalabusim long Chibok taun long Nigeria, moa long tupela yia i go pinis.

Dispela video i kamap ples klia sampela de bihain long lida bilong Boko Haram, Abubakar Shekau, i tokaut olsem em i stap yet lida bilong Boko Haram. Dispela video i kamap ples klia sampela de bihain long lida bilong Boko Haram, Abubakar Shekau, i tokaut olsem em i stap yet lida bilong Boko Haram.

Dispela video i kamap ples klia sampela de bihain long lida bilong Boko Haram, Abubakar Shekau, i tokaut olsem em i stap yet lida bilong Boko Haram.

Bikpela kros na ol strong-pela toktok i bin kamap long olgeta hap bilong wol long taim ol Boko Haram i holimpasim na kalabusim ol 276 skul meri long Chibok long Epril 2014.

Boko Haram i save kilim nabaut ol pipel na i traिम long kamapim wanpela fundamental Islamik stet long not-is Nigeria.

Presiden Muhammadu Buhari i tok ol i winim pinis Boko Haram tasol gavman bilong em i wok long painim yet ol dispela skul meri. Dispela i kamapim sem long gavman na lida bilong kantri bikos Boko Haram i stap yet long Nigeria.

"Ol i mas save olsem ol pikinini bilong ol i stap yet

long han bilong mipela," wanpela man i tok long dispela video em ol i bin putim long YouTube.

Dispela video i tok em i kam long olupela nem Boko Haram, i no nupela Islamic State West Africa Province (ISWAP), olsem na ol i ting lain bilong Shekau i bin putim aut dispela video.

"I gat sampela meri, samting olsem 40, i marit pinis," dispela man i tok long dispela 11 minit video. Video i soim ol meri i karamapim pes i sindaun long graun na sampela i sanap long bak-sait.

"Sampela bilong ol i dai pinis bikos long ol bom ol balus i bin dropim."

Dispela man i singaut long gavman bilong Nigeria i mas larim ol Boko Haram kalabus i mas go fri na bai ol i lusim ol dispela meri tu.

Infomsen Minista Lai Mohammed i tok gavman i kontrolim ol samting long kisim bek ol dispela skul meri.

"Em i no namba wan taim mipela i kisim kain tok save olsem. Mipela i laik save olsem ol lain mipela i toktok wantaim i tok tru," em i tok.

Hong Kong protes lida i abrusim taim long kalabus



Ol lida bilong Ambrela Revolusen (L - R) Joshua Wong, Nathan Law na Alex Chow.

TRIPLELA lida bilong Ambrela Revolusen long Hong Kong i laki olsem bai ol i no inap kalabus. Ol dispela protes i bin kamapim ol bikpela reli long 2014. Kot i bin tokaut olsem bai em i no inap long givim taim long kalabus bikos long bikpela toktok bilong politiks i wok long kamap long siti nau.

Planti toktok i kamap na ol pipel long Hong Kong i pret bai Saina i pasim semi-atonomas gavman bilong ol na sampela lain i tok sapos ol tripela yangpela lida ya i kisim bikpela taim long kalabus, bai moa trabel i kamap.

Dispela kot keis i bin wanpela bikpela tru long ol pro-demokresi lain na human raits grup Amnesty Intenesenel i tok gavman bilong Saina i mekim olsem long 'pretim na givim tok lukaut' long ol lain ektivis long Hong Kong.

Tasol mejstret June Cheung i tok ol tripela difenden, Joshua Wong, Nathan Law na Alex Chow i no gat kriminal rekot, na ol i wari long ol hevi i wok long kamap na long wok politik.

'Ol i wokim eksen,' em i tok. 'Kot i bilip dispela keis i no wanpela kriminal keis. Mi save olsem ol i soim ples klia tingting bilong ol.'

Mis Cheung i tok tu olsem

'em i no stret long givim taim long kalabus long ol dispela difenden bikos long politiks.' Wong, 19, na Law, 23, bai mekim ol komyuniti sevis wok bikos long protes we ol studen i kalapim banis na go insait long eria bilong ol opis bilong gavman long namel long siti long Sivik Skwea.

Kot i givim namba tri ektivis, Alex Chow, 25 krismas, tri wik suspended sentens.

Ol tripela inap long go kalabus long tupela yia long taim ol i bin kamap long kot long las wik Mande.

Ol polis i arestim ol bihain long ol protes i kamap long Sivik Skwea long Septemba 2014 tasol dispela i kamapim moa protes tupela de bihain na ol polis i tromoi tia ges long rausim ol pipel.

Dispela i mekim ol bikpela demonstresen i kamap inap tupela mun, we planti tausen manmeri i singaut long fri ileksen bilong makim ol lida bilong siti. Tasol maski planti tausen pipel i protes, Beijing i no harim kra i bilong ol.

Long taim bilong protes, ol pipel i bin yusim ambrela long karamap long taim ol polis i tromoi tia ges na lombo spre i olsem na ol i kolim dispela muvmen Ambrela Revolusen.

Ol Kurdish Peshmerga fos i traिम gen long kisim bek Mosul



Ol Kurdish Peshmerga i ran long ol militeri kar long saut-is Mosul.

Ol Kurdish Peshmerga fos i pait strong gen wantaim oIslamic State (IS) grup long kisim bek Mosul, we ol IS i kamapim olsem kapital bilong ol long Iraq, ol lain Kurdish opisa i tok.

Ol i stat long muv i go insait bihain long ol lain em USA i go pas long en i bomim ol lain bilong IS, wanpela Reuters nius ejensi koresponden i ripot long ples Wardak, 30 kilomita saut-is long Mosul.

Ol militen i pait bek, paia long motar long ol soldia na pairapim tupela kar bom.

Wanpela Peshmerga komanda i tok ol i kisim bek sampela viles long ol strong-pela Sunni militen long taim ol Kurdish fos i muv i go long Gwer, ples ol i makim, i stap 40 kilomita saut-is long Mosul.

Long taim ol i fiksip wanpela bris ol militen i bin bagarapim long Gwer, bai ol Peshmerga inap opim nupela banis raunim Mosul — dispela bris i kalapim Grand Zab riva em i kapsait i go insait long wara Tigris.

Ol lain IS i tokaut long

Amaq nius sevis bilong ol olsem ol suisaid draiva i bin draivim dispela tupela kar bom na ol i pairapim long wanpela viles long blokim ol Kurdish fos, na kamapim birua long bodi bilong ol Peshmerga.

Ol lain bilong atonomas Kurdistan i no tokaut long hamas lain i kisim bagarap. Ol i tokaut tasol long indai bilong wanpela Kurdish TV kamera man na narapela nius ripota husat i bin kisim bagarap.

Blakpela smok i kamap long ples bilong pait na planti sivilien i karim ol wait-pela plak na ranawe i go olsem long hap we ol lain Peshmerga i stap.

Amy bilong Iraq wantaim ol Peshmerga fos bilong Kurdish self-rul rijon i wok long banisim Mosul, 400 kilomita not long kapitel Baghdad.

Long 2014, lida bilong ol IS, Abu Bakr al-Baghdadi i bin tokaut long Gren Mosque bilong Mosul olsem em i kamapim wanpela "caliphate" i karamapim ol rejon bilong Iraq na Syria.

Ol National Guard bai helpim ol polis long stopim trabel

GAVANA bilong Wisconsin long USA, Scott Walker i singautim ol National Guard long helpim ol polis sapos moa protes i kamap long ples we moa blakskin pipel i save stap long Milwaukee we ol polis i bin kilim wanpela saspek husat i bin karim gan.

Milwaukee Polis Sief Edward Flynn i tok wanpela video i no gat toktok i soim polis opisa i mekim stret wok long taim em i sutim Sylville K Smith, 23, long Sarere bihain long em i no stop long trefik lait.

Sief Flynn i tok video long bodi kamera bilong opisa i soim Smith i tanim i go long opisa wantaim gan long han bilong em.

Bihain long dispela birua i kamap, planti tausen manmeri i bung na kamapim tra-

bel long nait long Sherman Park. Meya Tom Barrett i tok "mi no lukim kain pasin olsem long laip bilong mi long dispela siti."

Dispela eria i gat nem nogut long kram na ol tarangu lain, i bin stap isi bihain long ol pipel i kukim ol bisnis na ol kar na paia nabaut long gan. Ol i mekim olsem long soim ol i no wanbel long polis i kilim dispela blakskin man.

Ol polis i arestim 17 pipel bihain longol trabel i kamap.

Ol foapela polis opisa i kisim bagarap na i go long haus sik.

Mista Walker i tok ol Guard bai sambai tasol long helpim ol polis. Em i tok ol i no inap statim wok inap ol i kisim askim bilong helpim ol polis.

Ol polis i save husati bomim ol turis taun long Tailen

OL POLIS long Tailen i tok ol i save long husat i wok long pairapim ol bom long ol ples ol turis i save go raun long sauten hap bilong kantri na kamapim ol hevi long kantri we ol ami i kontrolim gavman.

Ol polis i tok ol i painim na rausim faivpela bom i no pairap. Interia ministri i tokaut olsem ol i bin painim tupela moa long mobail fon pek long wanpela maket long wanpela risot long Hua Hin.

Ol i painim wanpela paia bom long Phuket ailan na ol i rausim.

Long Phang Nga, ol i painim tupela bom long Sarere klostu long wanpela maket em ol i bin kukim long Fraide.

"Wanpela i wok tasol tu-

pela arapela i no wok," Phakaphong Tavipatana, gavana bilong Phang Nga i tok. Em i tok ol polis bai painim pinga prin long sampela bilong ol dispela bom.

I no gat ol lain i tokaut olsem ol i go pas long wokim ol 11-pela liklik bom na sampela bikpela bom em ol i pairapim long ol ples we planti turis i save raun long las wik Fonde na Fraide. Ol dispela bom i bin kilim foapela pipel bilong Tailen yet na planti arapela i bin kisim bagarap, sampela bilong ol em ol ovasis turis.

Ol dispela bom i bin pairap tu tu long ol holide risot long wiken na long Hua Hin na Phuket ailan.

"Ol wok painim bilong mipela i gohet na mipela i save long husat i kamapim



Ol polis long Tailen i patrol i stap.

dispela birua," deputi polis-mausman Piyapan Pingmuang i tok long Sande.

Em i tokaut gen long bilip bilong militeri gavman olsem wanpela grup insait long Tailen yet i go pas long ol dispela trabel tasol em i no givim moa tok save.

"Mi tokaut gen, dispela em samting ol lokal lain i

kamapim, i no ol teroris. Mipela i no gat teroris long Tailen," em i tok.

Ol polis i holim tupela pipel long Hua Hin — we foapela bom i pairap — na wanpela arest warent i go aut long wanpela saspek long kukim ol samting long Nakhon Si Thammarat provins, ol polis i tok.

ExxonMobil: Prodaksen i no gat hevi

EXXONMOBIL PNG i tok i no gat wanpela hevi i kamap long PNG LNG Projek na ol operesen bilong em long apstrim projek eria long Hela i ran gut.

ExxonMobil i mekim dispela toktok long kliarim tingting bikos las wik ol papagraun long Hides 4 PDL 7 i bin toktok long pasim opresen bilong Hides Ges Kondisening Plent.

Ol papagraun i bin singaut strong long pasim opresen bikos gavman i no bin peim sampela mani ol inap long kisim long taim yet.

Dispela mani em ol Infrastraksa Developmen Gren (IDG), Bisnis Developmen Gren (BDG) na ol royalti mani bilong dispela bikpela ges projek.

ExxonMobil, husat i projek opereta bilong dispela K43 bilien PNG LNG Projek, i tok ol gavman opisal i bin kam long Hides 4 long las wik Trinde na ol i toktok wantaim ol papagraun.

Tasol ol papagraun i no pasim Hides 4 ges kondisening plent na prodaksen bilong ges i kamap wankain olsem em i save kamap long olgeta de.

Fainens Minista James Marape wantaim Sif Seketeri Isaac Lupari i bin kisim wanpela deligesen bilong gavman i go antap long

Hides na tokim ol papagraun olsem mani bilong ol i stap gut long Benk ov PNG.

Wanpela maus meri bilong ExxonMobil i tok ol papagraun i wok long protes yet na i givim taim long gavman long givim olgeta mani bilong ol, tasol ol i no tasim wanpela samting bilong kampani.

Em i tok dispela protes bilong papagraun i kamap namel long ol yet na gavman, na prodaksen bilong ges long ol welhet long Hides i kamap yet.

Taim ExxonMobil i salim moa long 200 kago bilong PNG LNG i go long Saina, Japan na Taiwan, ol papagraun i no kisim wanpela royalti mani bilong ol.

Fainens Minista James Marape i tok mani bilong ol i stap long Sentral Benk.

“Mani bilong yupela i stap gut long Sentral Benk. Taim kot i painimaut long ol trupela papagraun bilong projek eria, gavman bai rausim dispela mani na givim i go long ol papagraun tru,” Mista Marape i tok.

Praim Minista Peter O’Neill i tok gavman bai no inap beim mani bilong PNG LNG papagraun long Pot Mosbi tasol bai kamap long Tari, Hela Provins.

Parkop salensim Madang pipel long lukautim NCD investa



Nupela Supreme Investmens supamaket long Nu Taun i wok long pulim planti kastoma tru bikos prais bilong ol kaikai em daunbilo stret.

James G. Kila i raitim

GAVANA bilong Nesenel Kapitel Distrik (NCD), Powes Parkop i salensim ol pipel bilong Madang olsem ol i mas lukautim gut ol bisnis lain o investa husat i laik kirapim bisnis long Madang provins bikos bisnis bai givim wok long ol manmeri.

Mista Parkop i givim dispela salens taim em i bin go long Madang long opim wanpela nupela supamaket em Supreme Investments Limited bilong NCD i go wokim long Madang.

Supreme Investments em bisnis bilong wanpela man bilong Saina nem blong em lan husat i statim wantaim liklik stua bilong em long 6-Mail na Erima long Mosbi. Dispela yia tasol em i go long Madang long opim nupela supamaket, holsel na groseri stua bilong em long Nu Taun arere long Kuperu mausrot na Bidamon kresen long Modilon rot.

Dispela stua i stap long naispela eria we i ken sevim ol komyuniti bilong Nu

Taun, Yabob viles na lain long ol viles long Amele eria na taun tu wantaim. Tude planti manmeri stret i wok long go long dispela supamaket bikos prais bilong en i daunbilo.

Mista Parkop i tokim ol manmeri husat i stap long opening bilong dispela nupela stua olsem dispela investa bilong Saina i no ting long bringim mani em i wokim i go ausait long kantri long Saina o ovasis. Em i investim gen long kantri taim em i wokim narapela bikpela supamaket long Madang.

Mista Parkop i tokim ol lain manmeri husat i bin stap long opening seremoni olsem gavman nau long dispela taim i no save givim wok tumas. Ol bisnis na pravit sekta nau i save givim moa wok long ol skul-liva na ol yangpela manmeri, olsem na ol Madang pipel i mas tingim dispela na lukautim gut ol investa i go long provins.

Em i tokaut olsem papa bilong Supreme Investmens

i putim K20 milien long kirapim dispela nupela supamaket, riteil, groseri na holsel stua bilong em long Madang long sevim Madang komyuniti.

Mista Parkop i tok, kamap bilong dispela nupela stua i kamapim wok long ol manmeri bilong Madang husat pastaim i no gat wok na stap nating.

“Yupela ol pipel bilong Madang i mas lukautim investa husat i kam long ples bilong yupela.

“Mipela i amamas long bringim hap bilong Mosbi i kam long Madang, olsem na mipela askim yupela long lukautim em gut.”

Em i tok tu olsem Madang em wanpela naispela ples bipo we planti lain i save laikim. Tasol nau planti kain kain lo na oda hevi i wok long bagarapim gutpela nem bilong Madang. Tasol dispela i ken senis taim ol manmeri i senisim tingting na wok hat long graun bilong ol na tu rispek na sapotim bisnis long provins bilong ol.



PNG LNG Projek i salim pinis moa long 200 kago bilong PNG LNG i go long Esian eneji maket.

PNG stopim tred wantaim Fiji

PNG bai stop long tred wantaim Fiji bikos em i wok long pasim dua long larim sampela samting bilong PNG long go insat long Fiji maket.

Minista bilong Komes, Tred na Industri, Richard Maru, i tok PNG i wok long larim planti samting bilong Fiji i kam insait long kantri.

Tasol Fiji i les long larim PNG i salim sampela samting i go long maket long Fiji, na dispela i no stretpela pasin.

“Mi laik tokim Fiji long lukluk gut long ol samting bilong em. Ol i save salim planti samting i kam long PNG maket.

“Las yia tasol, PNG i bin salim i go long Fiji K16.6 milien mak bilong ol samting mipela i save mekim long hia.

“Na Fiji i bin salim i kam long PNG K52.20 milien mak bilong ol samting ol i save mekim

long hap,” Mista Maru i tok.

Em i tok PNG i laik salim Ox & Palm na Trukai Rais i go long Fiji na salim long hap.

Tasol Minista bilong Turisim, Tred na Industri bilong Fiji i bin tokim Mista Maru long wanpela bung bilong Melanesian Spearhead Grup long Port Vila, Vanuatu olsem Fiji bai lukluk long dispela samting.

Tasol Fiji i no mekim wanpela gutpela bekim na PNG i wet yet na i les pinis, Mista Maru i tok.

“Nau mipela bai mekim bikpela ‘tred pait’egensim Fiji. Mipela i larim em long salim planti kaikai na ol samting bilong em i kam long open maket bilong yumi long hia.

“Tasol ol i laik konaim mipela. Dispela i no stretpela pasin na PNG Gavman i givim 14 de notis long Fiji long bekim dispela toktok,” Mista Maru i tok.

Investa mas rispekim ol manmeri

OL investa na bisnis manmeri husat i laik kam mekim bisnis long PNG i mas rispekim ol manmeri, Praim Minista Peter O’Neill i tok.

Mista O’Neill i tok ol investa i no ken lus tingting long komyuniti na sosel obligesen bilong ol taim ol i kam inves na mekim bisnis long dispela kantri.

Mista O’Neill, husat i no bin wanbel long polisman i bin sutim wanpela man long 8-Mail long las wik, i tok

wanpela investa laik sanapim ol haus long dispela ples na i bin rausim ol manmeri husat i stap long hap.

Ol dispela manmeri i no gat len taitel na ol i kamapim dispela ples olsem setelmen. Taim dispela nupela kampani i laik kam insait na wokim haus long hap, em i bin kisim ol polisman i go insait long dispela ples na rausim ol manmeri long hap.

Mista O’Neill i tok em i no wanbel long ol investa i

yusim polisman long kilim ol manmeri bilong yumi yet.

“Ol investa i no ken yusim ol polisman long kilim lain bilong yumi yet. Ol i mas rispekim ol manmeri bilong yumi. Ol i mas mekim bisnis long stretpela wei aninit long lo,” Mista O’Neill i tok.

Em i bin mekim dispela toktok long Palamen long Tunde long dispela wik taim. Memba bilong Chuave, Wera Mori, i askim long dispela hevi.

Digicel i mekim pripeid data plen i go isi

DIGICEL i mekim sampela senis long ol data plen bilong ol pripeid kastoma na dispela i mekim isi long ol kastoma i ken baim moa data plen wantaim planti gutpela samting.

Digicel i lonsim dispela nupela data plen long las wik na ol kastoma i ken kisim nupela data plen taim ol i kolim *777# USSD long menu.

Dispela nupela plen bai lukim ol kastoma i ken kisim 60MBs o 13GBs, we ol kastoma bai inap long makim hamas data ol i nidim na long hamas de ol i laik yusim.

Ol kastoma bilong Digicel bai kisim sans long makim sapos ol i laikim dispela plen bilong ol long kisim data i kamap otometik.

Menesing Dairekta bilong Digicel Mobile, Shivan Bhargava, i tok dispela wei bilong

makim data plen nau i kamap isi tru long larim ol kastoma i baim ol data plen, sekim o topim ap kredit balens na riniuim data plen bilong ol.

“Dispela *777# menu em i isi long yusim na dispela i ken helpim ol kastoma long makim hamas data ol i laik yusim na hamas data plen ol i laik kisim long laik bilong ol yet,” Bhargava i tok.

“Mipela i laik mekim samting i kamap isi long helpim ol kastoma bilong mipela na givim ol moa sans long yusim data plen long laik bilong ol yet.

“I no gat wanpela bikpela samting i stap long larim ol kastoma i luksave long dispela. Ol kastoma bai yusim wanpela isi menu long mekim dispela olgeta samting.”

BSP tok lukaut long trik pasin

Bank South Pacific (BSP) i givim tok lukaut-long pablik na long ol kastoma long putim was long ol trik teks mesis, email, telepon kol na ol leta o pas.

Taim mobail fon i kam insait long kantri bilong yumi na taim planti manmeri i yusim mobail fon, planti trik na giaman pasin i kamap long paulim ol kastoma.

Ol man husat i wok long giamanim ol manmeri wantam trik pasin i wok long yusim mobail fon, na tokim ol kastoma bilong BSP olsem ol i laik givim sampela mani.

Moa long en, ol dispela manmeri bilong mekim trik i wok long tokim ol manmeri long kisim dinau mani long BSP.

BSP Grup Jeneral Menesa – Retail Benking, Paul Thornton, i givim dispela tok lukaut long ol kastoma olsem BSP i no ranim wanpela promosen long givim mani.

Mista Thornton i tok BSP i no save tokim arapela manmeri long makim maus bilong benk na salim ol dinau mani i go long ol kastoma.

Ol manmeri husat i laik kisim dinau mani long BSP i save go stret long benk na lukim ol wok manmeri bilong ol BSP brens long kisim dinau mani.

“Sapos ol kastoma i kisim wanpela telepon kol o teks mesis olsem ol wok manmeri bilong BSP i laikim komisin mani long hari-apim wei bilong kisim dinau mani, ol kastoma i mas tokim menesmen bilong BSP.

“Ol kastoma i no ken bihainim toktok bilong dispela kain trik pasin. Mipela i laik singaut strong long ol kastoma i no ken givim PIN Namba o pas wod ol sapos ol i kisim dispela kain teks mesis o telepon kol i kam long ol kon manmeri.”

Mista Thornton i tok dispela trik pasin i



BSP Grup Jeneral Menesa-Retail Benking, Paul Thornton.


paulim sampela ol manmeri pinis na ol i westim nating sampela mani long peim ol dispela kon manmeri, husat i giaman olsem ol i wok manmeri bilong BSP.

“Wankain olsem arapela ol benk na fainensal institusen, BSP i save baim ol kastoma i go pas na i save bihainim stret ol gutpela lo na polisi long mekim wok na sevim ol kastoma.

“BSP i no save givim ol infomesen nating long ol manmeri na askim ol long baim sampela mani o askim ol PIN namba na pas wod bilong ol kastoma,” Mista Thornton i tok.

Mista Thornton i askim ol manmeri long tok save long BSP sapos ol i kisim dispela kain ol trik teks mesis o telepon kol i kam long ol stil lain.

Ol kastoma i ken ringim BSP long 3201212/70301212 o salim email: hoax@bsp.com.pg long tok save long dispela kain trik pasin.



BSP wokmeri Joan Kunda i mekim awenes long yusim Mobail Benking.

NCSL wok manmeri kisim kastoma sevis trening

KASTOMA sevis em i namba wan prairiti bilong NAS-FUND Contributors Savings & Loan Society Limited (NCSL) na menesmen bilong NCSL i save larim ol wok manmeri i kisim trening long sevim ol memba gut.

Las wik long Pot Mosbi, NCSL i bin kamapim wanpela trening long 7-pela wok manmeri bilong em long larim ol i kisim save long mekim wok bilong ol gut.

Mista Francis Navir bilong NCSL Lahir brens i tok ol i lainim planti gutpela samting tasol tripela namba wan samting we mipela i lainim em ol Long Tem Velu, Pret long Kastoma na Eleveta Toktok.

“Long Tem Velu na Pret long Kastoma em i wanpela samting we mi save ekprens long olgeta de tasol mi bin luksave olsem dispela tupela samting em i namba wan samting long wok bilong mi,” Mista Navir i tok.

Em i tok em i amamas stret long kisim dispela trening we intenesenel na profesenel treina, Richard Coles, husat i gat planti yia eksprens long indastri, i bin kam trenim ol.

Mis Josepha Wunum bilong Vanimo brens i luksave tu olsem ol nid bilong kastoma na wanem samting ol i laikim em i wanpela bikpela samting we ol wok manmeri i mas luksave na helpim ol gut.

“Mi lainim planti gutpela samting long dispela trening na tu mi bin luksave long planti samting mi save mekim olgeta de olsem kastoma sevis opisa long brens level,” Mis Wunum i tok.

Richard Coles, husat i papa bilong Richard Coles International Training And Development, i bin ranim dispela trening bilong ol.

Mista Coles i tok as tru bilong dispela trening em long

trenim ol junia wok manmeri long kastoma sevis na maketing trening.

“Dispela trening bai helpim ol kastoma sevis opisa long putim ol kastoma na memba i go pas, tingting bilong ol bai pas long wok, na ol bai helpim ol kastoma hariap,” Mista Coles i tok.

Hiumen Risos Menesa bilong NCSL, Darusilla Musi, i amamas long dispela trening na i tok ol kastoma sevis opisa long wan wan brens bai gat save long helpim na sevim gut ol memba bilong NCSL.

Ol wok manmeri bilong NCSL long Pot Mosbi, Kavieng, Kimbe, Lahir, Tabubil na Vanimo i bin kam kisim dispela trening.

NCSL i luksave olsem trenim em i wanpela bikpela investmen na em bai givim moa trening long ol wok manmeri bilong em long larim ol i kisim moa save long sevim gut ol memba bilong NCSL.

Angore papagraun kamapim lidasip komiti

OL papagraun bilong Angore PDL 8 long PNG LNG Projek i kamapim wanpela nupela lidasip komiti long makim maus bilong ol papa bilong welhet na toktok wantaim gavman, kampani na arapela ol stekholda bilong projek.

Las wik Fraide, Siaman bilong Angore Welhet Lidasip Komiti (AWLC), Hari John Akipe, i tok ol papagraun bilong Angore i laik stretim hausman bilong ol na redi long kisim ol mani we gavman na projek divelopa bai givim long ol long mekim bisnis.

Mista Akipe i tok ol welhet i kamap long graun bilong foapela klen tasol, i no planti klen. Tasol ol man husat i stap ausait long

PDL 8 na welhet eria i wok long isi isi kam insait long giamanim gavman, kampani na arapela ol stekholda.

“I no gat arapela papagraun i stap. Ol welhet bilong Angore i stap aninit long graun bilong foapela klen.

“Arapela man i laik stil na kam insait. Ol i wok long giaman na kisim dinau mani, haia kar, na arapela ol samting.

“Em ol stilman. Tru tru papagraun bilong Angore em dispela komiti mi makim maus long en,” Mista Akipe i tok.

Em i tok ol i nau redi long toktok wantaim kampani na gavman aninit long dispela komiti.

ANX redi long helpim manmeri

OL manmeri PNG husat i laik salim o baim haus i mas tok save long ANX Real Estate Brokers.

ANX em i nupela ril estet kampani we i laik helpim ol manmeri long baim o salim haus.

Menesing Dairekta bilong ANX, Elwis Kamb, i tok dispela kampani i save helpim ol manmeri PNG, na i no save sasim bikpela mani.

“Mipela i save kamap olsem namel man. Planti manmeri i laik baim haus tasol sampela ol i no gat taim long painim haus.

“Sampela i save painim hat long raun raun long olgeta hap na painim haus. Sapos yu

wanpela dispela kain man o meri, orait salim wari bilong yu i kam long ANX.

“Sampela manmeri na kampani husat i gat haus long salim i save painim hat long putim long niuspepa bikos em i bikpela mani.

“Mipela i laikim ol dispela kain manmeri long kam lukim mipela. Mipela i stap long Facebook. Ol manmeri i ken salim tok i kam long Facebook na sekim mipela.

“Mipela i redi long wokim bisnis wantaim ol. Salim email kam long anxrealestate@gmail.com,” Mista Kamb i tok.

**Buy Your Air Niugini Ticket
Anywhere, Anytime
Using BSP Mobile Banking.**



Reminders:

- > Must be a registered BSP Mobile Banking customer.
- > Obtain a booking reference with Air Niugini prior to making a phone banking payment.
- > Use your e-ticket details to Check-in at the airport or online via www.airniugini.com.pg
- > Available to Digicel and bmobile-vodafone subscribers. Mobile service charges apply.
- > Fare conditions apply.



Air Niugini
www.airniugini.com.pg



Travel Purchase Queries: 180 3444
ehelpdesk@airniugini.com.pg

Mobile Banking Registration: 320 1212 / 7030 1212
servicebsp@bsp.com.pg www.bsp.com.pg

Kurumbukari maining wok lain kisim mau painapel

James G. Kila i raitim

OL MAINING wokman bilong Ramu NiCo Menesmen (MCC) long Kurumbukari Main long Usino-Bundi distrik long Madang provins long las wik i bin bisi stret long kisim ol mau painapel long liklik gaden bilong ol arere tasol long prosesing plent eria bilong ol. Maski olsem ol wokman bilong maining, tasol planti long ol dispela lain wokman i gat save tu long wok

gaden na lukautim ol prut na kumu. Ol dispela painapel gaden em ol wokman i planim long 2014 na 2015 long promotim grin envairomen long maining eria. Ol i laikim olsem maining eria klostu long main plent long Kurumbukari i mas stap grin na tu ol prut na sayor na ol arapela diwai i ken givim gutpela win na ples i mas luk nais. Long dispela taim Ramu NiCo Kurumbukari Main menesmen i makim taim we i lukim ol China

wokman wantaim ol PNG wanwok bilong i stretim graun na redim ples we i stap nating insait long benefisiesin plent na ol i groim ol dispela samting. Moa long wan handet wok lain i givim taim long redim ples na planim painapel na banana na ol naispela flaua arere long opis eria na bikipela plent bilding long Kurumbukari long dispela taim. Ramu NiCo Deputi Jen-

eral Menesa bilong Kopret Opis, Charlie Hu i tokaut olsem bikipela as tingting bilong dispela lenskepung wok long Kurumbukari Main em long kamapim gutpela grin ples we ol pisin na binating bilong bus i ken go na amamas na stap na tu bringim gutpela win

long ol manmeri i ken pulim na amamas. Stat long las wik antap ol Saina na PNG wanwok bilong ol i amamas stret long lukim ol mau-painapel long gaden arere long main plent eria na ol i go kisim na karim i go long rum bilong ol.



Ol Ramu NiCo maining wok lain i pikim ol mau painapel long liklik ol blok arere long wok ples long Kurumbukari main plent eria.

WHITE TUNA FLAKES
DIANA White

WHITE TUNA insait K 2.20

DIANA Barbecue Flavour

Tasty and Flavourful White Tuna for Everyone!

Manufactured by: RD Tuna Canners Ltd.

Manam laik lainim wok bilong GRA



Madang Gavana Jim Kas i bung wantaim ol investa long Madang. Foto: Jame. G. Kila

James G. Kila i raitim

GAVANA bilong Madang Jim Kas i bin go pas long wanpela delegesen o grup bilong Madang husat i bin go long Kokopo las wiken long painimaut na luksave long wok bilong Gasel Restoresen Atoriti (GRA).

Dispela delegesen i laik kisim sampela ekprians o save long wanem wok em Gazel Restoresin Atoriti i bin karimaut pinis long sait long infrastraksa na sosio-ekonomik helpim i go long ol pipel bihain long maunten paia i bin kamap long Rabaul long 1994.

Mista Kas i tokaut olsem dispela raun bilong ol long Is Nu Briten i ken givim Madang gavman sampela tingting na i ken helpim nupela Manam Risetelmen Atoriti long wok ol i ken mekim bihain long helpim long muvim moa long 20,000 Manam Ailan pipel husat i stap nau long ol kea-senta long bikiples long Bogia na Sumkar distrik.

Gavana Kas i tokaut olsem wanpela kain agrimen bai ol i sainim insait long wik i kam long wanem wok MRA i ken wokim bihainim lek-mak bilong GRA long Is Nu Briten.

Dispela raun bilong Madang delegesen i go long Kokopo i bin kamap bihain long Nesanel Palamen i bin givim tok-orait long Manam Risetelmen Atoriti (MRA) Bill.

Raun bilong delegesen tu bai helpim MRA long painim rot long helpim wok bilong ol bihain long menesim nupela eria gavman i bin baim long ol Manam ailan pipel i ken go stap long en long Andarum long Midel-Ramu.

Ol lain husat i bin go wantaim Mista Kas long Kokopo las wiken em Madang Provinsal Edministreta, Daniel Aloj, Dairekta bilong Ramu Dvelopmen Faundesen, Boga Figa, Siaman bilong Manan Kaunsil ov sif, William Rupunae na wanpela komyuniti lida bilong Andarum, Philip Bangtar.

Ripot Wantok Niuspepa i kisim long Bogia i tok olsem maski planti kain kain toktok i kamap long midia, ples long Andarum i stap bus yet na no gat developmen wok i kamap long hap. Moa long en tu, ol Manam pipel long kea-senta i wok long bungim planti kain kain hevi long sait long helt servis na ol i nidim tru helpim bilong gavman.

Schooling i winim namba wan Olimpik gol bilong Singapore

JOSEPH Schooling bilong Singapore i daunim Michael Phelps long swimming na i winim namba wan Olimpik gol medal bilong Singapore.

Schooling i apim nem bilong Singapore bikos ol i bin winim tupela silva na tupela brons medal tasol, stat long taim ol i bin joinim Olimpik resis long yia 1948.

“Dispela em i wanpela hatpela rot, na mi bin mekim wanpela samting we i no gat wanpela lain long kantri bilong yumi i bin mekim bipo. Mi i kisim planti sapot na dispela em i wanpela bikpela samting,” Schooling i tok.

Mama bilong em na presiden, Tony Tan, i bin sanap long sia na lukluk long taim

Schooling i resis we em daunim Phelps bilong USA long fainel 100 mita bataflai resis long Fraide na winim gol na ol narapela i winim mak long wankain taim winim silva.

“Dispela taim em i no taim bilong mi, tasol em i taim bilong kosa bilong mi, ol poro na famili bilong mi bikos ol i bilip olsem mi bai winim mak na setim nupela rekot,” Schooling i tok.

Schooling i bin winim namba wan medal bilong Singapore long Wol Sempionsip long yia i go long 100 mita bataflai resis tu, na em i brukim tupela rekot bilong ol Asia.

Long Fraide, em i setim nupela Olimpik rekot long 50.39 seken.



Joseph Schooling bilong Singapore i sanap wantaim gol medal bilong em long hap bilong swim long 100 mita fainel resis bilong ol man.

Farah i winim gol long Olimpik 10,000 mita resis

MO Farah bilong Gret Briten i winim gol medal long 10'000 mita resis long Olimpik Gems olsem em i bin winim long London Olimpik resis long 2012.

Farah i laik mekim gen long 5,000 mita i go long 10,000 mita long Rio olsem em i bin mekim long London long namba tu nait bilong resis long Olimpik Stediam we em i bin go

klostu long wanpela lek mak long winim mak.

Fara em i namba siks man long kamap tupela taim sempion long 10,000 mita resis bilong ol man we em i bihainim lek mak bilong Paavo Nurmi, Emil Zatopek, Lesse Viren, Haile Gebrselassie na Kenenisa Bekele.

Tanui i winim silva na Tamirat Tola bilong Etophia i winim brons.



Mo Farah bilong Briten i winim gol medal long 10,000 mita fainel resis bilong ol man.

Ayana i brukim wol rekot long 10,000 mita resis

ALMAZ Ayana bilong Ethiopia i brukim wol rekot long 14 seken long winim Olimpik gol medal long 10,000 mita resis bilong ol meri long Rio.

Ayana em i gat 24 krismas em i namba tu taim bilong em long resis na i winim mak insait long 29 minit na 17.45 seken.

Jo Pavey bilong Briten em i namba 15 meri long setim namba wan rekot wantaim 31 minit na 33.44 seken long namba faiv resis bilong em long Olimpik Gems.

Vivian Cheriot bilong Kenya i bin winim brons medal long 2012 i kamap namba tu long resis wantaim 29 minit na 32.53 seken.

Tirunesh Dibaba bilong Ethiopia i kamap namba tri wantaim 29 minit na 42.56 seken.

‘Mi gat bikpela amamas long resis long namba faiv Olimpik resis bilong mi, tasol tru mi kamap lapun. Mi trai hat tasol, mi no inap long ran strong wantaim ol,’ Pavey i tok,

Ayana em i namba wan meri long brukim wol rekot bilong 10,000 mita resis long Olimpik Gems.

Marathon wol rekot holda, Paula Redcliffe, i tok, “Mi hat long save gut long dispela mak. Taim mi lukim wol rekot long 1993, mi no inap long bilip long wanem samting mi lukim. Ayana i brukim dispela taim.”



Almaz Ayana bilong Ethiopia setim wol rekot long 10,000 mita resis wantaim 29 minit na 17.45 seken. Bipo rekot em 29 minit na 31.78 seken we Wang Junxia bilong Saina i bin putim long 1993.

Biles i winim gol medal long voilt resis



Simone Biles i winim gol medal long voilt resis long Sande.

SIMONE Biles i winim namba tri gol medal bilong em long Olimpik Gems long Sande long voilt resis.

Maria Paseka bilong Rasia i winim silva na Giulia Steingruber i winim brons na i kamap namba wan Swiss meri long winim medal long Olimpik resis.

Fom bilong Biles antap long eia i kamap namba wan tru. Em i skoim 16.033 na winim gol medal wantaim bikpela majin. Dispela em i namba wan voilt gol bilong Yunaitet Stet.

Pastaim em i bin winim wan wan resis na em i go long sait bilong tim bilong Amerika i save win.

Madison Kocian bilong Amerika i winim silva medal long aniven ba resis bilong Amerika na long sait bilong ol man em Alex Naddour i winim bons long Pommel hos resis.

Usain Bolt i stap top rana yet

KING bilong ran na bikpela namba wan rana long Rio Olimpik, Usain Bolt, bilong Jamaika i winim mak insait long 9.81 seken.

Em i namba wan rana long winim mak na kisim ples bilong em bek olsem namba wan

rana long olgeta taim.

Justin Gatlin bilong Yunaitet Stet i kamap namba tu ples wantaim 9.89 seken, na Andre De Grasse bilong Canada i kamap namba tri wantaim 9.91 seken.



Usain Bolt i kamapim histori long Rio wantaim namba tri taim bilong em long winim Olimpik gol medal long 100 mita resis.



Sefti trening long HPAL long Basamuk Rifaineri em bikpela samting

STAT long mun Jun i kam nau Ramu NiCo Basamuk Rifaineri menesmen i wok long givim trening long ol wokman bilong long hai presa esid litsing (HPAL) long strongim sefti wok oltaim.

HPAL em wanpela bikpela masin we i holim prodaksen bilong nikel na kobalt insait long wok bilong Ramu NiCo (MCC) long Papua Niugini.

HPAL Dipatmen bilong Ramu NiCo long Basamuk Rifaineri i gat tripela bikpela trein we insait bilong ol em traipela tru olsem bikpela jet balus stret. Na insait long ol dispela bikpela trein em masin i save kukim na rausim nikel na kobalt na kamap wantaim mikshaidroxaid prodak (MHP) we kampani i save salim i go long ovasis maket.

Wan wan ol tim long seksen bilong HPAL i bin stap long trening long save long wok long ol birua we i ken

kamap long taim bilong wok na tu wanem rot long banisim o stopim na abrusim buria.

Trening we i bin kamap pinis i karamapim tripela eria, namba wan i lukluk long eria bilong wok na ol bikpela o trein HPAL, na wanem ol samting i stap long sistem bilong HPAL na wanem samting ol wokman i mas save gut long en taim ol i wok long hap.

Namba tu eria em long wanem wok bilong ol masin long HPAL na ol masin kontrol sistem, na namba tri eria em long Stendet Operating Prosidsa (SOP) bilong HPAL. Dispela namba tri eria i lukim long wei bilong statim ol masin na pasim masin na nomal operesen bilong masin na wanem samting long mekim long masin taim birua i kamap na sistem kontrol bilong masin long HPAL.

Ol sistem plen na wanem wok we i mas kamap long HPAL em stendet bilong ol em antap tru na dispela trening tu i bin givim ol wokman save long sait long lukim wok long buk na save na tu long praktikol wantaim.

Wan wan ol wokman i bin wokim test aninit long lukluk bilong ol supavaisa. Narapela trening bai kamap gen long bihain long givim ol moa save taim sampela pat bilong masin ken i go long HPAL dipatmen.

Dispela trening i givim gutpela tingting na save long ol wokman long HPAL long save long sait long sefti na pasin long helpim wanpela arapela long mekim gut wok long seksen bilong ol.

MRA i bin givim oda long Ramu NiCo long pasim wok long HPAL trein 3 bilong en long Epril 15. Dispela stopwok oda i bin kamap bihain long wanpela birua i bin kamap we i lukim wanpela wokman bilong Saina i bin lusim laip bilong en.

Ol MRA inspekta bihain long wok sekim bilong ol long long mun Jun i givim tok-orait nau olsem HPAL trein 3 i ken statim wok gen na ran wantaim HPAL trein namba 1 na trein namba 2.

Olsem na kain trening bilong ol wok man na meri husait i wok long HPAL na Basamuk Rifaineri bai givim moa save long wok pasin bilong abrusim kain ol bikpela birua na prodaksen i ken kamap long sif wei bihainim tingting bilong MRA na kampani tu.


Ramu NiCo Basamuk Rifaineri Deputi Jeneral Menesa, Adam Lukey, husat i tokaut long dispela gutpela nius i tok olsem dispela em bikpela samting long Ramu NiCo long em i ken go het long wokim wok bilong en

nau olsem ol i kisim tok-orait pinis.

Mista Lukey i tokaut tu olsem dispela tok-orait i gat ol kondisen bilong em we

Ramu NiCo i mas bihainim. Dispela ol kondisen i go wantaim ol ripot we i bin kamap pastaim long Ted Pati Investigesin Ripot long

HPAL trein 1 na trein 2 na HPAL trein 3 Insiden Investigesin Ripot we Ramu NiCo i givim i go long MRA Mains Inspektoret.




HPAL eria long Basamuk Rifaineri.



Ol MRA Mains Inspekta sekim ol wok eria long BSK.



Tupela HPAL trein wok na autim smok.



135 KM Slurry Pipeline

KBK Mining

BSK Refinery

HP Spot i kondaktim awenes long Lae

HAI Pefomens (HP) Spot-PNG Spot Faundesen i mekim ol awenes program long Lae, Morobe Provsins, long dispela wik.

Dispela iven i kamap ples klia long stat i go inap long ol i setim HP Momase Senta bilong Ekselens long Sir Ignatius Kilage Stediam (SIKS). Dairekta bilong HP, Aaron Alsop, na tim bilong em i salim pas i go long ol spoting grup na wan wan lain husat i gat laik long spot long provinsal level i go antap long nesenel level long SIKS long stap wantaim long fri infomesen sesen.

Em i tok program bai stat long Fraide, Ogas 19 long 2 klok i go inap long 4 klok apinun na ol bai ranim gen long wankain taim long Sarere, Ogas 20.

Em i tok moa olsem Tim Morobe bai i gat sans long bung wantaim HP long Sarere.

“Taim ol bai opim Momase Senta bilong Ekselens long Oktoba, ol bai mekim pablik awenes long winim sapot bilong pablik long stat i go inap long taim bilong opening,” Alsop i tok.

“Planti lain i laikim HP tim bikos ol i sapotim ol spot, etlit na kosa bikos mipela i pilim olsem em i gutpela long kam na bungim spot komyuniti long Momase rijon.

“Tim Morobe Jenerel Tim Menesmen na Morobe Spot Opisal i raitim pas i kam pinis long bung wantaim tim bilong mipela long toktok long mekim wok redi long PNG Gems.

“Dua bilong dispela sans i op yet i stap long ol nara-pela provins long rijon i ken bung wantaim mipela long Lae long SIKS we nupela opis bilong mipela i stap long en,” Alsop i tok.

Australia Hai Komisn sapotim AFL Program



Kaunsila bilong Australian Hai komisn, Tim Bryson, i givim ol spot ikwipmen i go long AFLPNG.

LONG rot bilong strongim Australian Futbol Lig (AFL) program long Papua Niugini, Australian Hai Komisn (AHC) i go insait na sapotim dispela program wantaim ol spot ikwipmen.

Australian Futbol Lig Papua Niugini (AFLPNG) i kisim sampela moa spoting ikwipmen long strongim spot program bilong em long kantri.

I gat 11 provinsal senta bai kisim ol futbol, jesi na terning ikwipmen we Australia i givim long helpim ol long strongim ol yangpela long pilai wantaim na ol pipel husat i stap wantaim

disabiliti i ken trening tu.

Australian Hai Komisn i redim mani bilong salim ol ikwipmen long Brisbane, Australia, i kam long Pot Mosbi long sip aninit long Dairek Eid Program sapot.

Kaunsila bilong Australian Hai komisn, Tim Bryson, i stap wantaim long AFL klinik long Boroko Praimeri Skul, we em i givim ol ikwipmen ol i givim long AFLPNG.

“Em i bikpela samting long sapotim dispela kain namba wan projek bilong ol spot i gat nem. Yangpela program bilong AFLPNG i gat 45,000 lain i stap wantaim

long olgeta hap bilong Papua Niugini. Mipela i ting olsem ol ikwipmen long Australia bai helpim long skruim ol program na strongim ol yangpela manmeri long Papua Niugini long stap wantaim.

“Olsem long Australia, mipela i save olsem Papua Niugini i gat bikpela laik long pilai spot na dispela AFL ikwipmen em i bikpela samting long ol lokal komyuniti,” Bryson i tok.

Dairek Eid Program i helpim long redim ol mani long projek we em bai helpim long winim ol bikpela developmen long komyuniti level.

Digicel Kap fainel bai kamap long POM

NAMBA tu wik bilong fainel bilong Digicel Kap resis bai kamap long Sir John Guise stediam long Pot Mosbi long Sande.

Edministreta bilong Papua Niugini Nesenel Ragbi Lig (PNGNRL), Stanley Hondina, i strongim dispela toktok bihain long bung

long Tunde moning.

Long 1 klok opinun em ol maina premia, Snax Lae Tigers, bai pilai egensim ol Wamp NGA Mt.Hagen Eagles. Bihain bai ol Agmark Rabaul Gurias bai pilai egensim ol Enga Provinsal Gavman Enga Mioks long 3 klok apinun.



Digicel Kap fainel bai kamap long Sir John Guise Stediam long Pot Mosbi long tupela wik kam.

Mirupasi Lawyers

i winim Daffodil Gof salens

DAFFODIL Kopret Gof Salens bilong 2016 i kam kamap long mak long Fraide wantaim Mirupasi Lawyers i kamap wina.

Oil Search Limited i save spona long dispela resis long wan wan yia inap long 14 yia i go na 26 tim i resis long Fraide wantaim Mapai Transport Tim long Lae.

Ol i pilai long bungim mani bilong PNG Cancer Faundesen long mekim program bilong en long olgeta hap long kantri. Ol i bin bungim K91, 720.

Ol i bin reisim dispela mani aninit long tim re-

jisresen, fain, donesen na long sainim Kumul Jesi we Oil Search i givim na long sainim PNG SP Hunters Trening siot we SP PNG Hunters i givim.

Long wankain taim, Oil Search Eksekutiv Jenerel Menesa bilong Stekholder Engesmen, Gereaa Aopi, i tok tenkyu long Pot Mosbi bisnis komyuniti long sapot bilong ol long olgeta yia.

Em i tok tenkyu tu long Jacob Luke na Mapai Transport Tim bilong em long Lae we olgeta yia taim resis i stat, em i save kam long Pot Mosbi long pilai.

Teteh i go aut long ol sisen



Tompson Teteh i ran wantaim bal taim ol Hunters i bin pilai egensim ol Easts Tigers.

SENTA pilaia bilong Papua Niugini SP Hunters, Tompson Teteh, bai no inap pilai moa long ol sisen.

Teteh i kisim wanpela bikpela bagarap taim hap-bek bilong Blackhawk, Michael Parker-Welsh, i takelim em long skru bilong em. Dispela birua i kamap long taim 8-pela minit i stap yet long pilai egensim ol Blackhawks. Blackhawks i winim Hunters, 24-20.

Teteh i stap yet long pilai graun na i pinisim gem, tasol em i bin lukim wanpela dokta bihain long pinis bilong pilai. Ol i kisim em i go long Townsville haus sik we em i go insait long operesen. Sif Eksekutiv Opisa bi-

long PNG Ragbi Lig, Bob Cutmore, i tok, Teteh i stap orait long Sande nait na bihain long medikal riviui, ol i bin rausim em long haus sik.

“Tompson pilim bikpela pen na i go long operesen we em i bin pinis long Sande, 4.30 moning. Operesen i go orait na mipela i ting olsem Teteh bai kam bek long Pot Mosbi long Trinde, asde,” Cutmore i tok.

Asisten kosa, Nigel Hukula, i bin stap bek long Townsville wantaim Teteh.

Kosa bilong Hunters, Michael Marum, i go lukim Teteh long haus sik bipo long lusim Townsville na i tok, ol wokman bilong haus sik i lukautim Teteh gut.

“Operesen i kamap orait na bikpela tenkyu i go long ol woklain bilong Townsville haus sik,” Marum i tok.

“Mi bin lukim gen video piksa bilong dispela asua na em i luk nogut olgeta we skru bilong birua pilai i go stret insait long nogut hap.”

Marum i tok, ol i bin tokim ol famili bilong Teteh na ol bai lukautim em inap long em bai orait.

“Tompson i stap long gutpela fom na em bai no inap pilai long pinis bilong dispela sisen em i bikpela lus long mipela taim mipela i go insait long las tupela gem i stap yet. Mipela bai givim em olgeta sapot na strongim em long kamap orait kwik taim.”

BSP i sponsa long Nesenel Snuka Taitel

BENK Saut Pasifik (BSP) i sponsa long Nesenel Snuka Taitel resis bilong ol man wantaim K20,000.

Benk i amamas long kamap poro wantaim Papua Niugini Biliard na Snuka Asosiesen (PNGBSA) olsem Neming Rait sponsa bilong Nesenel Snuka Taitel bilong ol man.

Vais Presiden bilong PNG-BSA, John Chan, i tok tenkyu long benk long em i go het na sapot.

“BSP i bin sapotim PNG-BSA long go pas long namba wan iven bilong em aninit long yia kalenda bilong 14 yia i go. Dispela sapot i strongim spot long gro na we ol yangpela man na meri insait long kantri i ken pilai,” Chan i tok.

BSP Nesenel Kapitela Distrik Eria Menesa, Stanerd Wai, i givim sek i go long PNGBSA na i tok, “Mipela i amamas long kamap wan em bai bringim ol pilaia long olgeta hap long kantri long pilai long strongpela na gutpela envairomen.”

“Aninit long dispela patnasip, mipela i luksave long mipela yet long olgeta level insait long kantri,” Wai i tok.

Wai i tok tenkyu long bikpela sponsa na i laikim ol pilai long pilai gut long dispela resis.

Maina o B gret sempionsip bai stat long Septemba 7 i go inap long Septemba 11 na A gret sempionsip bai stat long Sep-



BSP NCD Eria Menesa, Stanerd Wai, i givim sek i go long Vais President bilong PNGBSA, John Chan taim ol pilai i lukluk i stap.

temba 14 i go inap long Septemba 18.

Ol i bin makim namba eit taim PNG sempion, Djerne Fong, strongim taitel bilong em long namba nain yia bi-

long resis taim liklik brata bilong em, Monty, bai strongim maina taitel.

“Wanpela strongpela resis bai kamap long maina na meja sempionsip bilong dis-

pela yia,” Chan i tok.

Ol i lukluk long makim 40 pilai long meja taitel na 48 pilai long maina taitel.

Chan i tok tenkyu long menesmen na ol wok lain bi-

long hap bilong resis, Aviat klap, Dragon's Den na Lamana Q klap, long ol i yusim ol fesiliti long 2016 BSP Nesenel Snuka Taitel bilong ol man.

Kosa bilong ol meri Wewak i amamas

KOSA bilong soka tim bilong ol meri Wewak, Catherine Kusunan, i amamas long tim bilong em i pilai gut long Besta Kap Kwalifaia long Madang.

Kusunan i tok tonamen i givim strong long ol yangpela pilai bilong em, husat ol i praimer na sekenderi skul sumatin tasol.

Wewak i kamap namba foa long resis na Kusunan i tok, tonamen i skulim ol pilai wantaim ol nupela

samting na ol i lukluk long mekim gut long yia i kam.

Em i tok moa olsem Momase Bes Kwalifaia i redim gutpela ekspiriens bilong planti ol yangpela pilai long mekim gut long ol bikpela resis bai kamap bihain.

Lokal Ogenaising Komiti Siaman bilong Momase Bes kwalifaia, John Maripal, i apim nem bilong ol yangpela meri pilai bilong Wewak tu, bikos ol i soim kala bilong Is Sepik stret.



Ol yangpela pilai bilong Wewak Besta tim.

Toea Wisil i putim ai long 2018 Komonwelt Gems

Sam Seke i raitim

SEMPION sprinta bilong Papua Niugini Toea Wisil i tok pinis em bai trening strongna go winim wanpela medal long Komonwelt Gems long Gold Coast, Australia long 2018.

Toea i tokim kosabilong em bihain long em i bin kam namba 4 long 100 mita hit resis bilongem long Rio Olympic Gems, na em i no inap go long narapela raun. Maski olsem em i bin

winim sempion sprinta bilong Australia husat i bin stap tu long dispela resis.

Chef de Mission bilong Tim PNG long Rio, Emma Waiwai i tok Toea i no amamas long resis bilong em long wanem em i no kamap long mak em i bin kisim long Melanesian Sempionsip long Fiji long mun i go pinis.

Tasol Wisil i bin tokim kosabilong em olsem, em bai trening strong moa long go resis long Komonwelt Gems long tupela yia bihain.

Pinau i pinis las long resis



Theo Pinau i ran long 200 mita resis bilong ol man.

RANA bilong Papua Niugini, Theo Pinau, i traim strong, tasol pinisim las long 200 mita resis bilong ol man long Rio Olimpik Gems.

Pinau i ran long raun wan bilong hit siks na i winim mak insait long 22.14 seken. Pesonal bes bilong em yet long 200 mita resis bilong ol man em 20.97 seken.

Nickel Ashmeade long Jamaika i kamap namba wan long resis we em i bin winim mak insait long 20.15 seken, na Adam Gemili long Briten i kamap namba tu wantaim 20.20 seken.

Tupela wantaim i go insait long 200 mita semi-fainel resis bilong ol man.



Toea Wisil i bin kisim gol medal long Melanesian Gems, tasol em i no inap long Rio Olimpik.

Malabag i opim komyuniti spot program

MINISTA bilong Helt na HIV/AIDS na Memba bilong Mosbi Not Wes, Michael Malabag i tokaut long komyuniti spot program long ilektoret bilong em long mekim wok redi long 41 yia Indipendens selebrensen long Septemba.

Moa long 1000 yangpela, ol man na meri bai stap wantaim long dispela spot program. Ol bai ogenaisim ol yet insait long komiti long kamapim ol lokal klap. Ol bai pilai 13s Tas Ragbi na Volibal resis long ol wan wan kaunsil wod long olgeta hap long ilektoret inap long Septemba 16, 2016.

Ol i tok long putim K12,000 prais mani na edukesen skolasip tu bai stap.

Projek Opisa bilong Minista Malabag, Angus Ali, na NCDC Sosel Sevis Menesa, Kila Dick, i bin lonsim Mosbi Not Wes Spot Enensmen Program long Sarere long Fot Bena pilai graun long Waigani, Pot Mosbi.

Dispela program bai strongim ol yangpela, man na meri long Morata na Waigani long stap wantaim na welkamim ol lain bipo long gem bai stat.

Mista Ali, husat i makim maus bilong Minista Malabag na i tok olsem, ol namba wan samting bilong spot program em i bilong divelopim seif na disiplin

komyuniti long stopim ol lo na oda asua i kamap long komyuniti.

Ali i tok sampela gem em ol i bin stat pinis long ol wan wan kaunsil wod bilong Mosbi Not Wes ilektoret.

“Mipela i kamap wantaim moa long 160 klap long Tas Ragbi resis na 200 klap long volibal resis pinis,” Ali i tok.

Ol gem nau ol i pilai em volibal resis bilong ol man na meri na 13s Tas Ragbi resis bilong ol man. Ol i bin mekim tupela divison, 'A' na 'B' gret, long Tas Ragbi resis bilong ol man.


Em i tok moa olsem, ol wan wan spotting divisen insait kaunsil wod bai kisim K12,000 prais mani 32 edukesen skolasip em ol bai givim long ol namba wan na disiplin pilai.

“Malabag i stap baksait long sapotim ol lokal resis, tasol em i hat long kisim ol ripot bilong mani long ol ogenaisa long olgeta hap long kantri,” Ali i tok.


“Mipela i bin bihainim ol ogenaisa bilong lokal spotting long kisim ol ripot bilong mani long ol yia i go. Tasol, aninit long dispela program, ol prais mani na tropi bai stap long opis bilong Memba.”

Kila Dick i sapotim program na i tok olsem ol i kirapim spot long komyuniti level i ken helpim ol pipel long stap gut long komyuniti.

RIO Olimpik Gems Poto bilong ol etlit bilong Tim PNG husat i go resis long Rio 2016 Olimpik Gems



Ryan Pini i redi long klap i go insait long pul na resis long Rio Olimpik Gems.



Ryan Pini i resis i go long namel bilong pul.



Ryan Pini i malolo bihain long pinis bilong resis.



Toea Wisil i resis egensim ol narapela kantri na ol i ran i go long namel long hap bilong resis.



Toea Wisil i winim mak bilong resis taim sampela i laik winim mak bihain long em.



Toea Wisil i apim su bilong em bihain long em i winim mak pas long ol narapela rana.




Max na Samantha Kassman i trening long pait long Rio Olimpik Gems.



Trena bilong Max Kassman i trenim em bipo long em i pait.



Samantha Kassman i kikim Max long taim bilong trening.



WHITE TUNA FLAKES
DIANA White



Manufactured by:
RD Tuna Cannery Ltd.

WHITE TUNA
insait
K 2.20



Tasty and Flavourful White Tuna for Everyone!

Olam, Wera na Abavu i go aut long Hunters

...Zeming
na Amean
i kam bek

TRIPLELA pilaia bilong SP Hunters, Justin Olam, Bland Abavu, na Adex Wera, em ol i bin rausim bihain long Judiseri bilong Kwinslan Ragbi Lig (QRL) i bin mekim vidio riviu long pinis bilong gem egensim Townsville Blackhawks long Sarere.

Olam na Abavu em ol i bin rausim long stap wan wan wik ausait. Ol i bin sasim Olam long mekim wanpela solda sas na Abavu i bin mekim wanpela strongpela takel.

QRL Judiseri i rausim Wera long stap tupela wik long em i mekim wanpela strongpela takel long sait. Em bai no inap pilai long tupela propa gem bilong dispela sisen.

Kosa bilong Hunters, Michael Marum, i kisim bek Noel Zeming na Stargroth Amean long lainap bilong

Hunters long raun namba 24 bai kamap long Sande, bihain long tupela i bin kisim bagarap bikos ol i bin rausim ol tripela pilaia na senta pilaia bilong Hunters, Tompson Teteh, i pinis long dispela sisen bikos em i bin kisim bikpela bagarap.

Raun namba 24 resis bai kamap long dispela wik Sande em ol bai pilai egensim Northern Pride long Barlow Pak long Cairns, Australia.

Zeming na Amean i bin aut long 6-pela wik i go we Zeming i bin kisim bagarap long han na Amean i bin kisim bagarap long skru bilong em. Tupela i kam bek long lainap bikos tupela i orait.

Marum i kisim bek Wartovo Puara Jnr, Adam Korave na Nixon Borana long mekim 19 man skwat.

- Ol 19 man skwat em;
- 1 Stargroth AMEAN
 - 2 Butler MORRIS
 - 3 Noel ZEMING (Ko-Kepten)
 - 4 Edward GOMA
 - 5 Philemon KIMISIVE
 - 6 Ase BOAS
 - 7 Watson BOAS
 - 8 Enoch MAKI
 - 9 Warren GLARE
 - 10 Esau SIUNE
 - 11 Timothy LOMAI
 - 12 Ishmael BALKAWA
 - 13 Brandy PETER
 - 14 Sailas GAHUNA
 - 15 Adam KORAVE
 - 16 Benjamin HETRA
 - 17 Nickson BORANA
 - 18 Wartovo PUARA Jnr
 - 19 Atte Bina WABO

Tude apinun, Kosa Marum bai makim 18 man skwat long go long Cairns. Tim bai go long Cairns long Fraide moning long pilai egensim ol Pride long Barlow Park long 3.35 apinun long Sande.



Pilaia bilong PNG Hunters i ran strong egensim pilaia bilong Townsville Blackhawks long raun namba 23 resis long Jack Manski Oval long Townsville, Australia.



Taim yu senisim nepi bilong bebi bilong yu Senisim long Sensi

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg